

Ënëma Ngönte

Yesu wel wiak kutömweri sëen wë krismaki 60 ma 65 pöta ök won sëen Sonök ingre mor sauröaan retëng ëa. Ingre mor saö poröa Yesu Kristo pi Aköp pël wesa pötaan këlangön kat yawiem Sonök kosang sak öpënëak kent ëa. Son pi kus nent yapinte Patmos pötak wii kaatak wëen Anutuuk wangarötë yemangk pöl elmëak omën ënëm orööpnaatön pet elmëa. Wangar pötë këlangön kësang jaaröön Yesuuk Setenre kööre tok muntarö il mowesak piin kon wi kosang yewe-saurö kutömre yang ngolöpötë öpënëak pet elmëen ök niia.

Pöt epël wia.

Ngön ngës räaut *1:1-20*

Ingre mor saö ka 7 pötëeröaan retëng ëa *2:1-3:22*

Pepewer pesöm ëak wii 7 tëauta ngönte *4:1-8:1*

Kuup 7 pötë ngönte *8:2-11:19*

Kamal kësangëpre animaö nga ngaawaarë ngönte *12:1-13:18*

Wangar ke nentere nent mena *14:1-15:8*

Anutuu omnaröaan ya sangën 7 pötön itena *16:1-21*

Papilon kaö utpet wasën Seten këlangön kat wia *17:1-20:10*

Ngön ya kësangët orööpnaat *20:11-15*

Kutömre yang ngolöpötre Yerusalem ngolöpö *21:1-22:5*

Ngön mëët *22:6-21*

¹ Ngön epët ngaanëer elëep wiakaimautak Yesu Kristook tekeri wes wia. Ngön epët Anutuuk

Yesuun pim inëen ruuröen omnant akun wali nasën wiaan orööpna pötön tekeri wasëpënëak pet elmëa. Pël ëen pim ensel namp wes mëen ne Son pim inëen ruupön ök neeaut.

² Ne Sonök omën pötön itenak Anutuu ngön ök neeaöre Yesu Kristoë omnant tekeri wes nenaö pötenta poutön ök yeniak.

³ Omën namp ngön kë orööpna epët ngönënë wa toptak sangk kelëpna pöp ërëpërëp ëëpnaap. Ën namp ngön pep epweri retëng yeë epët sangk yekelën kat wiak ngaarëk öpna pöpta ërëpërëp ëëpnaap. Ngön pöta këët orööpna akunet temanöm yes pötaanök.

Sonök ingre mor saö ka 7 pötë wëauröaan pep retëng ëa

⁴ Ne Son nook ngön epët ingre mor saö Esia yangerak ka 7 pötë wëaurö arimëen retëng ë yan- ingk. Anutu ngaan panëer wakaimaup peeneeta wë wakaim öpnaap piire Ngëëngk Pul Anutuu itöök ur pim wel aisëak ngarangk yaalni pöta naë wëaö pöök komre kolapre mayaap pöt ningkën arim naë wiaap.

⁵ Ën Yesu Kristo puukta komre kolapre mayaap pöt ningkën arim naë wiaap. Pi wotpil wesak Anutuu ngönte tekeri wes yangingkaupök wet rëak weletakaan wal ëak yang omp aköröa kaö sak wë.

Pi tapöpök tiarimëen lup sant elniak tiarim kangiir wel wia pötak utpetatë öngpökaan ent ë nuulëa.

⁶ Pël ëak puuk niaan piiring kaö sak ngarangk eim kiri ar yaauröa ök Anutu pim Pepapë inëen sak omnaröaan kimang yamëëaurö. Tiar pourö

Yesu Kristo pim yapinte wak ngaarëk isak yemaan ngarangk elnieim öp. Yaap.

⁷ Kat wieë. Yesu pi kutöm kepilötring wais oröön omën pourö itaampenaat, omën pim wel wi-pënëak elmëa pöröaring. Pël äak yangerakë omën pourö piin itenak pitëm utpet elmëautaan kangut mampnaaten ya ngës ëën ing kaö apnaat. Yaap pan.

⁸ Aköp Anutu weëre kosang pepap, ngaan wakaimaup peeneeta wë wakaim öpnaap, pi epël ya. “Ne tapöp wot räaupök kaalak ënëm remaap.”

Son pi Kristoon itena

⁹ Ne Son, arim karip, tiar Yesuring yal menak wëën Anutuuk wa ngaöök nimëën këlangön kat wieimeë kosang sak wë. Nem Anutuu ngönte ök neeaöre Yesu Kristoë omnant tekeri wes ne-nautön ök yaautaan kööre toköröak Patmos kustak neulëaut.

¹⁰ Pël ëën Sante, Aköpë akun pötak Anutuu Ngëëngk Pulö pim weëre kosangöök nem naë oröön ne kat wiin nem kasngaëlaan kuup nga ngön naöökë ya pöl ngön äak

¹¹ epël ya. “Omnant nim itaampë epot pout pepeweri retëng äak ka 7, Epesasre Simenaare Pekamamre Tiatiraare Satisre Pilatepiaare ën Leotisia ka potë ingre mor sauröaan wes momëëm.”

¹² Pël yaan ne talëpök nem kasngaëlaan ngönaak yenëa pöten itaampa yak kaip ti itaangkën es rampe koolötök ket ëa 7 äak wieëa.

¹³ Pël ëën ne itaangkën namp es rampe pötë tekarak wëa. Pöp omnampë ök sak ulpëën wali

el wesak sê ingesiarë il menaö namp mëak yepat koolötök ket ëa naö pim riperek rëëwarök ëak wëa.

14 Pim kepön ëpöt kölam panëëp, int awang ëpre uröam lup kölamötë ök. Ën itöörar pöt es wëlëngöökë ök panëöörar, omnant omnaröa lupötë wieëautön ityaangkaup.

15 Ën pim ing pöwesiarta aini ke nal nent yapinte paras pël yema pöt es kësangwesi ar ëak ompyaö wasën simpelang yera pöta ök yeëa. Ën pim këm ngön pömpel iitë nga yaurem kuk ya pöl yeëa.

16 Pim mor yaapköëwesi ari 7 ëak wali weëa. Öp newerta nalaan nal nga panëëwer pim këmtakaan orök irëëëa. Ën pim këëre wot kante këtëpë nga panë yema pöl ëëëa.

17 Ne piin itenak yaan sak imën kön sak kawingentiak sê pim ingesiarë naë ilëaut. Pël ëënak pim mor yaapköëwes nem rangk nowiak epël yenëa. “Ni kas ëëngan. Ne wot réaupök kaalak ënëm re-maap.

18 Kat wi. Ne wëwë pepapök wel wiak wal ëaup, peene om öp wë wakaim ömaap. Pël ëëë welere wel kakë kaö sak wë. Pötaanök nook kan pöwer tëak omnarö wal ë moulmëëmëak pöt pangk pël ëëmaap.

19 Pötaanök nim omën ityaangkën epot retëng ëëm. Omnant peene epotre ënëmak orööpna pout pël ëëm.

20 Nim itaangkën ari 7 ëak nem mor yaapköëwesi wak wëan pötre ën es rampe 7 ëak wieëa pöt ngön kepön nent. Pöta songönte epët. Ari 7 pipot ingre mor saö ka 7 pötë wë pöröa ngarangköröen ya. Ën es rampe koolötök ket ëa 7 pöt ingre mor saö ka 7

pötë wëauröen ya.”

2

Epesas kakë ingre mor sauröa ngönte

¹ Aköp es rampeetë tekarak wëaö pöpök epël yenëa. “Ni Epesas kakaan ingre mor sauröaan epël retëng ë.

“Ngön epët omën mor yaapkëewesi ari 7 ëak wali wak es rampe koolötök ket ëa 7 pötë tekarak kan ing yaaup nem ngönte.

² Ne arim omnant yaautön ëwat wë. Ar ya kosang mëmpööre këlangön kat yawiem kosang sak wë pël yaaö pöten ëwat wë. Ën pël yeem ar utpet omnaröa yaautön kaaö ëën omën pitëmtën, ‘Ten Kristoë ngön yaaö omnarö,’ pël kaar yaauröen wël ëak itenak pit kaar yaaurö pël kön wian pötenta ëwat wë.

³ Ën omën narö pit itaangkën ar nemorö pël sëen utpet yaniwasënak kaaö ëën sëp nenewasën këlangön kat yawiem kosang sak wëaö pötenta ne ëwat wë.

⁴ Pël yaautak omën eptaan arën kön wiin pangk naën yaë. Ngaantak ngës rëak kön wi kosang wesän pötak arim lup sant ëan pöt won së yes.

⁵ Ngaan ar wëwë ompyaut wakaimauröak wiap sak sëp wesän. Pötaanök arim wëwë ngaan pöten kaalak kön wiak ön. Pël ëak lup kaip tiak wëwë wet rëak wakaiman pöl ön. Ën lup kaip natiin ëënë pöt ne arim naë oröak arim es rampewes kama wëën ingre mor saurö won sënëët.

⁶ Arim wëwë ompyaut wakaiman pöt sëp we-sautak omën eptaan kön wiin ompyaö yaë. Nem

Nikolasre pim ingre moröröa wëwë utpetatëen kaaö yaalmë pöl arta yaalmë.

7 “Katringöröak Ngëengk Pulöök ingre mor sauröen ngön ök yenia pipët këëkë kat wiin. Omën namp pim wëwë ompyautak utpetat il wesak kosang sak öpna pöpön nook, ‘Ni wëwë kosangta këraamentëkaan ulöpörö neim ömëep,’ pël ök memaap. Këra pöment Anutuu ya lupöök wë.”

Simena kakë ingre mor sauröa ngönte

8 Aköpök kaalak neen epël ök yenëa. “Ni Simena kakaan ingre mor sauröaan epël retëng ë.

“Ngön epët omën wot rëaupök ënëm remaap, wel wiak kaalak wal ëak öp wëaup nem ngönte.

9 Arim këlangön kat yawi pöten ne ëwat wë. Ën omnantëen elek panë yeë pötenta. Pël yeëetak kutömweri arimëen omnant kësang wia. Ën omën narö pitëmtën, ‘Ten Yuta omnarö,’ pël ya pöröak utpet wesak yenia pötenta ne ëwat wë. Pit, ‘Ten Yuta omnarö,’ pël yaatak Yuta omën yaapörö won, Setenë ingre mor panë saurö.

10 Arim omën këlangön kat wiinëak yeë epten kas ëënganok kat wieë. Seten pi ar narö morök elniipënëak omën naröen maan wii kaatak nu-ulëepnaat. Pipët ar këlangön wak imeë kët more-siar pël sënëet. Pël ëënëetak Anutuun kön wi kosang weseim wë wel wiinë pöt nook wëwë kosangët ningkën neering wakaim öpenaat.

11 “Katringöröak Ngëengk Pulöök ingre mor sauröen ngön ök yenia pipët këëkë kat wiin. Omën namp pim wëwë ompyautak utpetat il wesak kosang sak öpna pöp es parëaöök së këlangön kat nawiipan.”

Pekamam kakë ingre mor sauröa ngönte

¹² Aköpök kaalak neen epël ök yenëa. “Ni Pekamam kakaan ingre mor sauröaan epël retëng ë.

“Ngön epët omën öp nalaan nal nga panëëwer weëaup nem ngönte.

¹³ Ne arim kakën ëwat wë. Seten pi ka pipöökö kaö sak wëën omnarö utpet kaö panë yaaurö. Pël yaauröak kön wi kosang yewesaut taë wak wë. Ën ngaan arim karip Antipas wotpil wesak nem ngönte omnaröen ök maö ima pöp omën utpet naröak arim kak Setenë ngarangk yaalmëa pörek pi mën wel wia akun pötak kasëng nenemangkën kön wi kosang neweseimaurö.

¹⁴ Pël ëauröak arim wëwë utpet epël yeë epotön ne kön wiin pangk naën yaë. Ar Pekamam kakaan ingre mor sauröa naëaan narö Pelam pim ngön kaarta ënëm yaaurö. Pelam pöp ngaan Pelakën wetete ök maan puuk Israel omnaröen morök maan animaö kön Anutuu ökre was kaaröroaan kiri ar ëaut yenem öngre omp nga ëaurö.

¹⁵ Ën arim naëaan naröeta tapël Nikolasre pim ingre moröroa ngön utpetatë ënëm yaaurö.

¹⁶ Pötaanök ar lup kaip tiin. Ën won ëënë pöt akun kot panë nentak arim naë wais oröömaat. Pël ëak öp nga nem këmtak wia epwerring omën piporöaring nimëmpaat.

¹⁷ “Katringöröak Ngëëngk Pulöök ingre mor sauröen ngön ök yenia pipët këëkö kat wiin. Omën pim wëwë ompyautak utpetat il wesak kosang sak öpna pöp kutömweri kaömp yapin mana pël ya pöt nem naë ëlëöp wia epot mempaat. Pël ëak kël kölam naööta mempaat. Kël pöök yapin ngölöp

nent retēng ēulmēēmaat. Yapin pöt omēn muntarō kōpēl wēēn omēn kēl pō waapna pōpōkēēr ēwat ōpnaat.”

Tiatira kakē ingre mor saurōa ngōnte

¹⁸ Akōpōk kaalak neen epēl ōk yenēa. “Ni Tiatira kakaan ingre mor saurōaan epēl retēng ē.

“Anutuu Ruup pim itōōrar es wēlēngōōkē ōk panēōōrar, omnant omnarōa lupōtē wieēa pōtōn ityaangkaup. Ēn pim ing pōwesiar aini ke nal nent yapinte paras pēl yema pōta simpelang yera pōl yeēa. Ngōn epēt Anutuu Ru ulōpōōkōp nem ngōnte.

¹⁹ Ne arim omnant yaautōn ēwat wē. Arim lup sant yaaōre kōn wi kosang wesak ya wot-pil mēmpō, nemēēn yak ya ompyaō mēmpōōre kēlangōn kat yawiem kosang sak wē pēl yaaō pōtōn ne ēwat wē. Arim wet rēak omnant eiman pōt peene il wesak ompyaō panē yaurō.

²⁰ Pēl yaurōak arim utpet epēl yeē pōten ne kōn wiin pangk naēn yaē. Ōng utpet yaaō namp ngaan wakaima yapinte Sesepele pōpē ōk yaē pōpōnta ar-ring ōpēnēak mēēaurō. Ōng pōpōk pimtēn, ‘Ne Anutuu tektek ngōn yaaō omēn namp,’ pēl kaar mēak ngōnēn kaarōt nem ēnēm yaalnēaurōēn ōngre omp nga ēēre animaō kōn Anutuu ōkre was kaarōrōaan kiri ar yaaō pōt nē pēl ēēpēnēak morōk yaalmēaup.

²¹ Nook pim omp nga yaaō pōt sēp wasēpēnēak akun mangkēn pi lup kaip natiin kaaō ēaup.

²² Kat wi. Ne ōng pōpōn maan yauman ēēpnaat. Ēn omp ōng pōpring utpet yaaō pōrōeta lup kaip natiin yaēēn pōt nook maan kēlangōn munt nant pitēm naē orō morēēpnaat.

23 Pël äak öng pöpë wëwëeta ënëm yaaurö mën wel mowiimaat. Pël ëen ka nantë ingre mor saurö pöten itenak ne omën pouröa könre lup wël yaaup pöten ëwat sêpnaat. Ne tapöpök ar omnarö neenem omnant yaautë kangut nimpaap.

24 Omën munt Tiatira kak wëaurö ar ngön utpet pöta ënëm naën yaaurö. Pël yeem ngön utpet pöten omën naröak, ‘Setenë ngön öngpököt,’ pël ya pöt ar ëwat nasën yaaurö. Pël yaaö pöröen epël ök yeniak. Ne këlangön munt nant naningkan, om epët pëen nimpaan.

25 Arim wëwë ompyaö yaaö pöt kosang panë wesak ön. Pël ëen nemënt kaalak akun nentak wais oröömaap.

26 Namp pim wëwë ompyautak utpetat il wesak kosang sak wë nem ngönte ngaarëk weimeë wel wiipna pöp nook weëre kosang menak köpël omnaröa kaö wes moulmëëmaap.

27 Pël ëen pi ngarangk ëëë aini sungkör naö wak wë omnarö yang kaput mööna kelak unön yaë pöl köpël omën pörö elmëëpnaap. Weëre kosang nem mampa pöt nem Pepapök nenaut.

28 Ne omën pöt menak tangewesta mempaat.

29 “Katringöröak Ngëëngk Pulöök ingre mor sauröen ngön ök yenia pipët këëkë kat wiin.”

3

Satis kakë ingre mor sauröa ngönte

1 Aköpök kaalak neen epël ök yenëa. “Ni Satis kakaan ingre mor sauröaan epël retëng ë.

“Ngön epët omën Anutuu Ngëëngk Pulö wak ari 7 äak wali wak wëaup nem ngönte. Ne arim omnant yaautön ëwat wë. Omnant yaaö pöt

omnaröak arimëen, ‘Pit wëwëetaring wëak yaë,’ pël yenia. Ën nook arim lupötön itaangkën wel wiauröa ök wë.

² Pötaanök wal ëak it nganga seë. Arim kön wi kosang yewesaö kot wieëaut sasa won sëpanok taë weseë. Arim omnant yaautön itaangkën Anutuu ëöetak wotpil naënörö.

³ Pötaanök ngön rë nuulön kat wiak wan pöten kön wiin. Pël ëak ngön pöt ngaarëk wak lup kaip tiin. Ar wal ëak it nganga nasën ëënë pöt nga omën nampë yaë pöl nem akuneten köpël wëen tapët pöt oröak kangut nimpaat.

⁴ Pël ëëmaatak ar Satis kakaan omën narö utpetat naën yaaurö. Omën naröa ulpëen kölamöt pëen ë yerangia pöl ar wëwë kölam wë. Ne arën kön wiin wotpilörö. Pötaanök arim ulpëen kölamöt ë yerangian pöl wëwë kölamtaring neering wakaim önëët.

⁵ Omën namp pim wëwë ompyautak utpetat il wesak kosang sak öpna pöpökëër ulpëen kölamöp më moulmëëmaap. Pël ëak pim yapinte wëwë kosangta pepeweriaan kërë nemoolanganëëp. Anutu nem Pepapre pim enselöröa ëöetak pi nemop pöt tekeri wesak amaap.

⁶ “Katrिंगöröak Ngëëngk Pulöök ingre mor sauröen ngön ök yenia pipët këëkë kat wiin.”

Pilatepia kakë ingre mor sauröa ngönte

⁷ Aköpök kaalak neen epël ök yenëa. “Ni Pilatepia kakaan ingre mor sauröaan epël retëng ë.

“Aköp ne omën ngëëngkëp. Ne tapöp omën kë panëëp. Ngaanëër Tewit pim yang omp ak sak weëre kosangring omnarö ngarangk elmëeima

pöl nook kutömweri omp ak sak weëre kosangring ngarangk eeë kanwer të wiin omën nampök newariipan. Ën kanwer wariin nampök pangk natëëpan, won pan. Ngön epët ne tapöpë ngönte.

⁸ Ne arim omnant yaautön ewat wë. Ar weëre kosang kësang won wë nem ngönte ngaarëk weiman. Pël yeem nem yapinte elëëp nenowasën tekeri wesak aiman pöten ne ewat wë. Pötaanök nook kanwer të nuwiin wiaan omën nampök yok pangk newariipan.

⁹ Kat wieë. Setenë ingre mor arim naë wëaurö pit pitëmtën, ‘Ten Yuta omnarö,’ pël kaar yenilaurö. Pit Setenë utpetatë ënëm yaaurö, Yuta omën yaapörö won. Omën pöröen nook maan arim ikanöök rar rë nuwesirak nemtok arimëen lup sant yaalnian pöten ewat sëpnaarö.

¹⁰ Ar këlangön kat yawiem kosang sak önëak nem arën ök yeniak pöt ngaarëk weiman. Pötaanök omën utpet nant yanggerak wëauröaan morök elmëëmëak yanggerakë wes mëëma pöt nook ar ngarangk yaalniin arim naë naarööpan.

¹¹ Ne akun kot nent won sëen arim ngësë waisumaap. Pötaanök omën nampök irikor elniin arim ompyaö yaauta kangut naön eënganëen ompyaut arim naë wia pöt kosang wes wak ön.

¹² Omën namp pim wëwë ompyautak utpetat il wesak kosang sak öpna pöp nook Anutuu ngönën tupta möör wapta ök wesak wesir moulmëëmaap. Pël eën pi Anutuu naë kosang sak öpnaap. Pël eën nem yapin ngolöpëtere Anutuu yapintere pim ka kaöaöökëët piik retëng ë ulmëëmaap. Ka pööké yapinte Yerusalem ngolöpö, kutömweri nem

Pepapë naëaan irapnaö.

¹³ “Katringöröak Ngëëngk Pulöök ingre mor sauröen ngön ök yenia pipët këëkë kat wiin.”

Leotisia kakë ingre mor sauröa ngönte

¹⁴ Aköpök kaalak neen epël ök yenëa. “Ni Leotisia kakaan ingre mor sauröaan epël retëng ë.

“Aköp nemënt ngön yaapta pepapök wotpil wesak Anutuu ngönte tekeri wesak yaaup. Ne Anutuu omnant pout ket ëa pötë pepap. Ngön epët Aköp nemtë ngönte.

¹⁵ Ne arim yaauta songönte ëwat wë. Ar nemëën kaaö panë elnëere lup sant panë elnë pël naën yaauro. Poutepar arim naë irikor ëak wia. Pötaanök arimtok kaaö panë elnëenëak kön wiak pöt pël elnëenëët. Ën lup sant panë elnëenëak kön wiak pöt pël elnëenëët. Pël ëenëetak poutepar irikor ëak wi naöpan.

¹⁶ Ar pöt nemëën kaaö panë elnëere lup sant panë elnë pël naën yaaö poutepar irikor ëak yeëan. Pötaanök ne arimëën kaaö elniak wa niolamaat.

¹⁷ Ar arimtën epël yaauro. “Ten monere uröm omën nant kësang wieëaurö. Omën kësang panë pöt tenimtokëer wak ompyaö wë omën nentaan ngöntök naën yaauroep, pël yak. Pël yaketak arim lupre könöt utpetatring wëen omnaröak yaköm elniipna salöröak yak. Arim lupötë omën nantëen ngöntök yeem it il tëak yool wë pöten arimënt itnaangkën wëan.

¹⁸ Pötaanök ne arën ök niamaan kat wieë. Ar nem naëaan songre sar ngolöp weë panëët wak ön. Pël ëak arim koröp yool wë pipot ngep ëenëen ulpëen kölam ompyautta nem naëaan ön. Pöt arim

koröp yool wë pipot omnarök it ningankën ëö sënganëën. Pël ëak i kolap nenteta arim itötë wa mëen omën nantön itaampunëën nem naëaan ön.

¹⁹ Ne omën nem lup sant yaalmëa pörö pit utpet yaëën pöt ngön kosang mëak wotpil yemowesaup. Pötaanök ar kosang ngentiak lup kaip tiin.

²⁰ Kat wieë. Ne ka kanrak taueë kontkont yaaup. Omën namp ne kontkont yemaan kat wiak kan të newiin pöt kakaati së piiring kaömp ngawi nak tenip önaat.

²¹ Omën namp pim wëwë ompyautak utpetat il wesak kosang sak öpna pöpön nook, ‘Ni nem naë wais nem omp ak urtak wel aisëak neering omnarö ngarangk ëëpa,’ pël ök memaap. Pöt ne utpetat kasëng menak nem Pepapë naë pim omp ak urtak wel aisëak omnarö ngarangk eim wë pöl arta ëënëët.

²² “Katringörök Ngëëngk Pulöök ingre mor sauröen ngön ök yenia pipët këëkë kat wiin.”

4

Kutömweri omnarö Anutuun yaya maim wë

¹ Aköp ngön ök neë pet irën ne wangar yemangk wesak itaangkën kutömweri kan newer të wieëa. Pël ëën omën këm ngön naö yaan kat wiin nem wet rëak kuup ngönöökë ök ngönaak neea tapöpök kaalak epël yenëa. “Ni eprek apër. Pël ëën omën ënëm orööpnaatön pet elniimaan,” pël yenëa.

² Pël yenëaan taptakëër Anutuu Ngëëngk Pulö pim weëre kosangöök nem naë oröön itaangkën kutömweri Aköpë ur nent wiaan Anutu pötak wel aisëëëa.

³ Pim kēere wot kante kēl kōp mōaō naōōrarēn yapintepar saspaare konilian pēl yema pōōrarē ōk pengpeng yeēa. Pēl ēēn iere kasir naō pim urtak wirō kaōrok elmēēa. Iere kasir pō kēl kēra ēp korōp orōa naōōn yapin emeral pēl yema pōōkē ōk yeēa.

⁴ Pēl ēaan ur nant 24 ēak omp ak urtak wa taap elmēak wieēa. Pēl ēaan ngarangk narōeta 24 tapēl ēak ur pōtē wel aisēēa. Pit ulpēēn wali kōlamōrō mēak ul koolōtōk ket ēaut omp akōrōa yewaēa pōtē ōkōt pitēm kepōnōtē waēak wēa.

⁵ Pēl ēēn Anutu pim ur wel aisēēa pōtakaan kent tangar mēnak tangre kaō kēsang yera. Pēl yaēēn pim urta itēkēēl es wēlēng 7 ēak yokota. Es wēlēng pōt Anutuu Ngēēngk Pulō.

⁶ Ēn ur pōta itēkēēl omēn nent i kaōre kōnitōtē ōk pan nent wieēa.

Pēl ēaan kutōm omēn mor kong nent wēwēetaring narō tekarak wēa. Pōrō omp ak urtak wirō kaōrok ēak taueēa. Pitēm it ulōpōt kēsang pan, koēlaan kasngaēl pangk ēak orōēēa.

⁷ Kutōm omēn wēwēetaring pōrō, namp kent nga laionōrōa ōkōp, namp pol purmakaō ompōrōa ōkōp, namp pi it omēn kēere wot kan waup, ēn namp int tuparōa ōkōp.

⁸ Kutōm omēn mor kong nent wēwēetaring pōrō pit wer 6 ēak uteēa. Ēn pitēm it ulōpōt kēsang panē orōēēa. Pōt weratē tomōkōlaan ikanōōkōl poutē pangk ēēēa. Pit pēl ēak wē Anutuun yaya yaaut lēng naēn, rōōkre kēt poutē epēl maim wē.

“Akōp Anutu ni weēre kosang pout weēaup.

Ni wakaimaupōk wēēn om wakaim omēēp.

Ni ngëengkëp, ni ngëengkëp, ngëengk panëëp.”

⁹ Kutöm omën mor kong nent wëwëetaring pörö pit Anutu omp ak urtak wel aisëëaup wë wakaim om öpnaap piin yaya maimeë ping wesak mëak yoöre ërëp maim wëaurö. Pit pël yaëën

¹⁰ ngarangk 24 pörö pit Anutu omp ak urtak wel aisëëa pöpë naë rar rë mowesirak yangerakël tok oriak wë omën wakaim öpna pöpön, “Puukëër weëre kosang pepap,” pël weseë pitëm omp ak ul koolötök ket ëa pöt perak urta ikanöök wiak yaya ngön epël maim wëauro.

¹¹ “O Aköp, ni benim Anutu.

Nuukëër kaö panëëp.

Ten pourö yaya niaimeë ping wesak niak nimtë naë weëre kosang wia pël yeniaan kë yes.

Nimtok omnant ël epot pout ket ëaup.

Nuuk wiaapënëak kön wiak ket ëën om wia.

Pötaanök yaya yeniaan kë yes.”

5

Sonök pep newer pesöm ëak wii tëak wiaan itena

¹ Ne kaalak itaangkën Anutu pi omp ak urtak wel aisëë pim mor yaapkëewesi pep newer weëa. Pep pöweri retëng nant koëlaan kasngaël ëëë. Pël ëaan omnaröak wilak sangk kelpänëak pep pöwer tep möak wii 7 ëak të ulmëëa.

² Pël ëaan ne itaangkën ensel weëre kosangring nemorök ngön ë olëak epël ya. “Omën wotpil talëpök pep epweri wii 7 ëak tëa epot pangk ilak pepewer wilëpën?”

³ Pël yaan omën nampök o kutömweriaan ma e yangerakaan ma yang epra ikanöökëlaan wotpil

nampök pep pöwer wilak itaampnaataan kengkën nasën äaut.

⁴ Pël ëën ne itaangkën wotpil nampök pep pöwer wilak itnaangkën ëën ing kësang panë äaut.

⁵ Pël ëën omën ngarangk nampök epël yenëa. “Ni ing anganëp kat wi. Yutaë kurmentëkaan kent laionöpë ök weëre kosang panë namp oröak wë, Tewitë ru äap. Pim wëwë ompyautak utpetat il wesaupök yok pangk wii 7 pöt pout ilak pep pöwer wilëpnaap.”

Son pi Sëpsëp Ruupön itena

⁶ Pël neaan ne itaangkën Sëpsëp Ru namp taueëa. Pöp omën mënauröa ök pim koröpök ëmpöl ëëa. Pi Anutuu omp ak urötere kutöm omën mor kong nent wëwëetaring pöröere ngarangköröa tekarak taueëa. Pim kepönöök watöt 7 äak oröëa. Ën itötta 7 tapël äak wëa. It 7 pöt Anutu pim Ngëëngk Pulö, kaare yang poutë wes mëën pangk äak wë pö.

⁷ Pël ëën ne itaangkën Sëpsëp Ru pöpök së Anutu pi pim omp ak urtak wel aisëak wë pep pöwer pim mor yaapkëëwesiil wali wak wëën kama yeön itenaut.

⁸ Pël yaëën kutöm omën mor kong nent wëwëetaring pöröere ngarangk 24 pörö Sëpsëp Ru pöpë naë së rar rë mowesirak yangerakël tok oria. Pit omën intöatë ök nant neenemot wak, ën söwar koolötök ket ëa nantta neenemot wak wëa. Söwar pötë öngpök omën nant Anutuun kiri ar ëën es koulöp köp nga kampöt ngaarëk yawisa pöt wieëa. Ës koulöp kamp ompyaö omnaröa Anutuun yayaare kimang yamëëaut.

⁹ Pit pël äak tan ngolöp nent epël yema.

“Ni omēn wotpil kaō panēēp, pepeweri wii tēa pōt yok pangk wa ilumēēp.

Omēn narōak ni nimēngkēn wel wian.

Pēl ēēn wel wian pōtak omnarō kaalak Anutu pimēēn kama waup.

Yaap, ni omēn mōōnre korōp naōre naō, ngōn nerere ner, yang poutēērō waup.

¹⁰ Nuuk maan pit niiring kaō sak wē kiri ar yaurōa ōk sak tenim Anutu pim inēēn sak omnarōaan kimang yamēem wēaurō.

Pēl ēak pit yanggerakē omnarōaan ngarangk elmēēpnaarō.”

Omēn pourō Sēpsēp Ruupōn yaya maim ōpenaat

¹¹ Pēl yemaan ne kaalak itaangkēn ensel selap pan kēm top ēak yaan kat wiaut. Ensel pōrōen sangk kelēn pōt selap pan tausenre milion pōta ōk yes. Pit omp ak urōtere kutōm omēn mor kong nent wēwēetaring pōrōere ngarangkōrō wa taap ēak taueē

¹² ngōn ēak epēl ya.

“Sēpsēp Ru omnarōa mēn wel wia pōp pi omnant poutē kaō saup,

poutē pepap, ēwaare weēre kosangre ēwat wieēaup pēl yamēem

yaya maimeē ping wesak yemaan kē yes.”

¹³ Pēl yaan ne kat wiin omnant pout Anutu pim mor ket ēa, kutōmweriaan yanggerakē, i kaōōkaan yangra ikanōōkē, pōtōk ngōnaak aō yesēn ne kat wiin epēl ya.

“Anutu pim omp ak urtak wel aisēeaupre Sēpsēp Ruup piaripōn

yōore ērēpre yaya maimeē ping wesak mēak weēre
kosangōt piarpim naē wia
kēt ēlōtē pēl maim ōpa.”

¹⁴ Pēl yaan kutōm omēn mor kong nent
wēwēetaring pōrōak, “Yaap,” pēl yemaan omēn
ngarangk pōrek wēa pōrō piarpim ikanōok rar rē
mowesirak yangerakēl tok oriak yaya yema.

6

*Sēpsēp Ruupōk wii 6 ēak tēa pōt pepeweriaan il
olēa*

¹ Ne kaalak itaangkēn Sēpsēp Ru pōpōk pepeweri
wii 7 ēak tēēa pōtēaan wan pō il yoola. Pēl ēēn ne
kat wiin kutōm omēn mor kong nent wēwēetaring
pōrōakaan nampōk ngōn ēak yaan kat wiin pim kēm
ngōn pōmpel tangre kaō ket ēak yarēm epēl yema.
“Ni wais.”

² Pēl yemaan ne kaalak itaangkēn pol os kōlam
namp wēa. Pōpē rangk omēn namp raēēp wak wel
aisēak wēa. Pēl ēēn omēn pōrek wēaurōak pi ul nent
waē yemoulmē. Pōt omēn nga wotōok yesaurōa
ulōtē ōkōt. Pēl ēēn pi omēn nga ēak il yewesaurōa
ōk nga ēak il mowasēpēnēak sa.

³ Sēpsēp Ru pōpōk kaalak pepeweri wii tēēa
munt 2 pō il yoolaan ne kat wiin kutōm omēn
wēwēetaring pōrōakaan munt nampōk, “Ni wais,”
pēl yema.

⁴ Pēl yemaan pol os munt kōp mōaō namp yaarō.
Pōpē rangk omēn namp wel aisēēa pōp pitōk
weēre kosang yemangk. Pōt puuk maan yangerak
mayaap won sēēn omnarō nener mēmpēnēak
weēre kosang yemangk. Pōtaanōk omēn pōp pi ya
pōt mēmpēna yak ōp nga panē newer yemangk.

⁵ Sëpsëp Ruupök kaalak pepeweri wii téeëa munt 3 pö il yoolaan ne kat wiaan kutöm omën wëwëetaring pöröakaan munt nampök, “Ni wais,” pël yema. Pël yemaan ne itaangkën pol os koö namp wëa. Pöpë rangk omën namp wel aisëëa pöp pi omën könömöt wël yaaö nent sikel pël yema pöt wali wak wëa.

⁶ Pël ëën ne kat wiin kutöm omën mor kong nent wëwëetaring pöröa tekrakaan nampök epël yema. “Omnaaröa ya lupötë kaömp nant utpet mowasën umön rë sëën ngöntök ëëp. Pël yeem kaömp öpënëak yaëën kaömp ompyaut kap kot nentak wesirak mon kësang 3 kina pöta ngönt wesak mangkën sum ëëpnaat. Ën tapël kaömp utpetat kap kot nentepar nent pötë wesirën mon 3 kina tapël sum ëëpnaat. Pël ëëpnaatak ni kaömp utpet yewasën pit olip kolapring nant ar ëëre wain i në pël ëëpnaat ngöntök ëëpanëën olipre wain yaat utpet mowasgan.”

⁷ Pol Sëpsëp Ruupök kaalak pepeweri wii téeëa munt 4 pö il yoolaan ne kat wiaan kutöm omën mor kong nent wëwëetaring pöröakaan munt ënëm nampök, “Ni wais,” pël yema.

⁸ Pël ëën ne itaangkën pol os koröpöök kaplak ilëa namp wëa. Pöpë rangk omën namp wel aisëëa pöp pim yapinte Wel pël yema pöp wëa. Pël ëën omën pim ënëm waisa namp pim yapinte Wel Kak pël yema pöpta oröak wëa. Pël ëën omën kutömweri wëa pöröak yanger kom ëak lup 4 wesak piarip yang lup ner menak omën yang pörök wëaurö mën wel wiipënëak weëre kosang yemangk. Pit epël ëëpnaarö. Pitëmënt nener mën wel wiire ën narö këënëën ya sak ilak wel wi, narö yauman ke nen-

tere nent wak wel wiire narö animaö ngaaröak mën wel wi pël ëëpnaarö.

⁹ Sëpsëp Ruupök kaalak pepeweri wii téeëa munt 5 pö il yoolaan ne itaangkën omën wel wia naröa könörö Anutuun kiri ar yaaurekë ikanöök wëa. Pörö pit ngaantak Anutuu ngönte taë wes wak wë tekeri weseima pötaanök kööre toköröak mëngkën pitëm könörö Anutuu naë wëa.

¹⁰ Omën kön pöröak ngön ë olëak maap epël yema. “O Aköp weëre kosang pepap, ni këëkë wesak wotpil yewesaup. Ni akun taltak yangerkë omnaröaan ngön ya mënak pitëm ten nimëna pöta kangut mamp?”

¹¹ Pël yemaan Aköpök omën kön pörö ulpëen kölam waliit neenemot menak epël ök yema. “Ar kaalak akun kot nent kë seim wëen arim kar ar-ring ya ngawi yamëngka narö mën wel wiipënëak yaö mëëa pörö pitta mën wel wiinak ne kangut arim kööre tokörö mempaat.”

¹² Pël yemaan ne itaangkën Sëpsëp Ruupök kaalak pepeweri wii téeëa munt 6 pö il yoolaan moup kësang panë nempel yamö. Pël ëën këtëp kaip tiak maan ne itaangkën poë koröp kouukë ök sak köö olaan ngoonöpta tapël kaip tiak maan omën iitë ök köp möak wëa.

¹³ Ën ariatta kutömweriaan ti yangerkak ngentiin itaangkën këra nantë ulöpörö köp namöön wiaan kent möak tö olaan wia pötë ök yaë.

¹⁴ Ën kutömwerta këra ëpötë pesöm mö yawi pöl ëën won yesën kaö kusre rosiratta tiak nerekaan nereké yaë.

¹⁵ Pël yaëën yang omp aköröere ngarangkörö,

nga omnaröa wotöököröere monere uröm omnarö, omën weëre kosangringöröere omën pourö, inëën ya yamëngk pöröere omën yaap wëa pörö pit pourö yang öngöpre rosiratë kël öngöp kësangötë ëlëöp ilëak wëa.

¹⁶ Pël ëak pit ngön ë olëak epël ya. “Këlre rosirat pelak ngep elniip, Anutu pim omp ak urtak wel aisëë itningampanëën ëlëöp ilepinaan, Sëpsëp Ruupökta ya sangën elniipanëën.

¹⁷ Akun kaöaö yaaröön kangut nimpa pöt peene yok oröak wia. Pël ëën Anuture Sëpsëp Ruup piarip ya sangën elniipnaan yaë. Pötaanök omën talëpökëer nga pöt il wasëpën?”

7

Israel omën 144,000 pörö Anutuun yaö elmëa

¹ Ngön pöt pet irën ne itaangkën ensel 4 ëak yang kaö 4 pötë taueëa. Yang kaö 4 pötëaan kent 4 tapël ëak wais i kaöre yang, wiire këra pöt möak utpet waspanëak ensel pöröak il warieëa.

² Pël ëën ne itaangkën ensel munt namp këtëpë yengampiaulaan oröak yawisën itenaut. Pi Anutu, wëwë pepapë, omën nent omnarö pimëën yaö wesak yapin mowiipna pöt wali wak is ensel 4 ëak Anutuuk yangerere i kaö utpet wasëpënëak weëre kosang mena pöröen ngön ë olëak ngön kosang yamëem

³ epël yema. “Ar peenëer teëntom i kaöre yang, wiire këra pöt utpet wasnganok. Kot nent kor wëën wet rëak omën tiarim Anutu pim inëën yaaurö pimëën yaö wesak yapinte pitëm ë kosatë mowiinak ënëmak yok pangk utpet wasënëët.”

⁴ Pël yemaan ne kat wiin öngre omp Anutuuk pimëen wesak yapin mowia pörö sangk kelën 144,000 pipël Israel omnaröa kurötë saulaan jaarö.

⁵ Pit epël ëa.

Yuta pim kurmentëkaan 12,000,

Rupen pim kurmentëkaan 12,000,

Kat pim kurmentëkaan 12,000,

⁶ Asa pim kurmentëkaan 12,000,

Naptalai pim kurmentëkaan 12,000,

Manasa pim kurmentëkaan 12,000,

⁷ Simion pim kurmentëkaan 12,000,

Liwai pim kurmentëkaan 12,000,

Isaka pim kurmentëkaan 12,000,

⁸ Sepulan pim kurmentëkaan 12,000,

Yosep pim kurmentëkaan 12,000,

ën Pensamin pim kurmentëkaan 12,000.

Omën piporö Anutuuk pimëen wesak pitëm ë kosatë yapin mowia.

Omën kësang panë Anutuun yaya mëëa

⁹ Ne omën pöt itenak kaalak itaangkën omën kësang panë wa top ëak wëa. Pöröen omën nampök yok pangk sangk naalpan. Omën pörö möönre koröp naöre naö, ngön nerere ner, yang poutëerö wais erën ëa. Pit Anutu, pim omp ak urtak wel aisëëëaupre Sëpsëp Ruup piarpim itëkëël taueëa. Pitëm wëwë ompyautak utpetat il we-sautaan ulpëen kölam waliirö mëak kewis komöt wali wak wëa.

¹⁰ Pël ëëë ngön ëak epël ya. “Tiarim Anutu, pim omp ak urtak wel aisëëëaupre Sëpsëp Ruup

piaripök tiar utpetetakaan kama nuun ompyaö wë.”

¹¹ Pël yaan ensel pouröak Anutu, pim omp ak urtak wel aisëëaupre ngarangk 24 pöröere kutöm omën mor kong nent wëwëetaring pörö wirö wa taap elmëak taueëa. Pël ëak pit omp ak urta itëkëël rar rë wesirak tok oriak Anutuun yaya mëak

¹² epël yema.

“Yaap, tenim Anutu,

ten nimëën ërëpërëp ëak ping wesak yeniak.

Ëwat pout nimtë naë wiaan yayaare yoöre ërëp yeniak.

Nuukëer weëre kosangring wëaupök

omnant pout pangk ngarangk yeëaup.

Omën pipot pout nim naë wiakaim wiaapnaat.

Yaap.”

Omën eporöa këlangön kat yawia pöt pet ira

¹³ Pël yemaan ngarangk 24 pöröa naëaan nampök neen epël pëël yenëa. “Omën ulpëen kölam waliit mëa eporö talörö? Tarëkaan waisa?”

¹⁴ Pël neaan ngön kangit epël yemak. “O kaöap, ne köpël. Nimtokëer ëwat wëen.” Pël maan puuk epël ök yenëa. “Omën eporö pitëm kööre toköröa këlangönë öngpökaan waurö. Pitëm ulpëenöt Sëpsëp Ruupë iitak iirak kölam wesaurö.

¹⁵ Pötaanök pit Anutu pim omp ak urta itëkëël taueë këtre röök poutë pim ngëëngk tuptak pimëen inëen yaalmëem yaya maim wëaurö. Pël ëen Anutu pimënt pim omp ak urtak wel aisëë ngarangk yaalmëaup.

16 Pit kaalak këenëen ëere iiten ë pël naëpan. Ën këtëpökta nga elmëere omën nantë es nga naöök pitëk isö pël naëpan.

17 Sëpsëp Ruup omp ak urta luptak wëa pöpök pit ngarangk elmëak mës wak së i kölokta yoolëaurek së wëwë kosangta iit kol mangkën nëmnaat. Pël ëen Anutuuk pitëm ing telapöt tum mokorak won mowasëpnaat.”

8

Sëpsëp Ruupök pepeweri wii téeëa 7 pö il olëa

1 Sëpsëp Ruupök kaalak pepeweri wii téeëa munt 7 pö il yoola. Pël ëen kutömweriaan ngön nent naën wieë akun kot nent ap aöa pöta ök won yes.

2 Pël ëen ne itaangkën ensel 7 ëak Anutuu ëöetak taueë kuup 7 tapël ëak yeön itenaut.

3 Pël ëen ensel munt namp wais Anutuun ur kiri yaalmëauta naë taö yeö. Pöp pi söwar koolötök ket ëa neweri omën nant köp nga kamp ompyaut wiipënëak wak wais taö yeö. Pël ëen pi omën es koulöp köp nga kamp ëëpna pöt kësang panë mangkën yeö. Omën köp nga kamp pöt Anutuun kiri yaalmëaurek ur koolötök ket ëa pötak kiri ar ëen es koulöp köp nga kamp ompyaut ngaarëk yawisem Anutuu omnaröa pimëen yayaare kimang yamëëa pötring erën ëëpënëak mangkën yeö.

4 Pël ëen ensel Anutuu ëöetak taueëa pöp pi omën köp nga kamp pöt moresi wak wë ar ëen es koulöpö ngaarëk yawisem Anutuu omnaröa pimëen yayaare kimang yamëëa pötring erën ëak yawis.

5 Pël yaëen enselëp pi söwar pöwer omën köp nga kampöt wiaan wak Anutuun ur kiri yaalmëautakaan es newes korak söwarweri wiak yanggerak yoola. Pël ëen kent tangar mënak tangre kaö kësang yeraan moup yamö.

Ensel 4 ëak kuup mëna

6 Ne pöt itenak kaalak itaangkën ensel 7 pörö pitëm kuup 7 ëak wak wëa pöt mëmpënëak yaë.

7 Ensel wet kaal rëa nampök pim kuupö wet rëak mëngkën kopi kësangpel ëp ulöpötring yepelën esre omën iitring ngentiak yang lup ner pour es kot won yes. Ën yang lup neraar om wia. Lup es kota pörek omnant wieëa pöt wiire këraare nön pout es kot won panë yes.

8 Ën ensel 2 pöpök pim kuupö yamëngk. Pël ëen tomönötë ök nempel es yokotön olaan i kaöök yengenti. Pël ëen i kaö ë naö kaip tiin omën i sëen naöörar om wieëa.

9 I kaö ë omën i sa pöök animaö wëa pörö pourö wel wiin wangat pout utpet yaë.

10 Ën ensel 3 pöpök pim kuupö yamëngk. Pël ëen ari naö es kalaö newesi yokot pipël pan kotak kutömweriaan ti yanggerak yengenti. Pël yaëen iitre i rëëpöt pout kom ëak 3 yes. Pël ëen ari pöök ngentiak yang nera iit ngep ëen munteraarëët om wieëa.

11 Ari ti ngentia pöökë yapinte welakre kakam pël ya. Pötaanök i we naöökël wieëa pöt welakre kakam sëen we naöörarë wieëaut om ompyaö wieëa. Pël ëen omën narö kësang i welak yaaö pöt nak wel yawi.

12 Pël yaëen ensel 4 pöpök pim kuupö yamëngkën këtëp kom ëak rongan 3 yesën ngoonöpre ariatta tapël yaë. Pël ëën këtëre ngoonre ari rongan 3 pötëaan nent mëngkën lup nent ëwa naën nenteparökëer ëwa yaë. Pël ëën këtëkre rö kanötë lup nentak ëwa naën wiaan lup nenteparökëer ëwa yaë.

13 Pël ëën ne itaangkën int tup kësang panë nemor wal ëak mopöök yesën kat wiaan int pöpök ngön ëak epël ya. “O yaköm, yaköm, yaköm pan. Ensel munt 3 pöröak pitëm kuupöt mëmpna pötak yangerakë omnaröa naë utpet kësang panë nempelëar nempel ëak orööpnaan yaë. Yang omnarö tol ëëpën?”

9

Ensel 5 pöpök kuup mëna

1 Ensel 5 pöpök kuup mëngkën ne itaangkën ari naö kutömweriaan tiak wais yangerak ngentiak wieëa. Ari pö ensel nampönök ya. Ën ne itaangkën yang öngöp wali panë naö wieëa. Pöökë leng ëa pörökën ne köpël. Yang öngöp pöökë kiet ensel pöp mangkën yeö.

2 Pël ëak puuk öngöp pöökë kanwer të wiin es koulöp naö öngöpöökaan oröak yawis. Es koulöp pö es kësangöte koulöpöökë ökö. Pël ëën es koulöp pöök këtëpre mop epö ka wariin koö yoola.

3 Pël ëën es koulöpöökaan mop narö oröak yangerak yeira. Pöröa kant yamëngka nga pöt körngapöröa yaë pöl yaaurö.

4 Pël ëën kutömweri wëauröak pitën epël ök yema. “Ar nönre këra, wiire omnant ke nampre nampöt

e yangerak orōak wē epot pout utpet wasnganak om mait elmēen. Ēn omēn Anutuun yaō ēak pitēm ē kosatē pim yapinte nawiin piporōakēer utpet mowasēn.

⁵ Ar ngoon 5 pōrōa ōngpōk omēn piporō utpet moweseim ōn. Pēl ēēnēetak mēn wel mowiinganok.” Pēl yemaan mop pōrō omēn narō kant mēnak kēlangōn yemongawis. Pōt kōrngap nampē omēn namp kant momkēna kēēm kat yawi pita ōk yeēa.

⁶ Ne omēn pipot poutōn itenaup. Pipot ngoon 5 pōrōa ōngpōk orōōpna pōtak wel wiipna kanten ap kēsang panē wasēpnaatak pangk kangk nokoipan. Pit wel wiipēn kōn wiak pēl ēēpnaatak pangk pēl naēpan.

⁷ Ne itaangkēn mop pōrō pol osōrōa ngaōōk sēpēnēak kopēta wes ulmēen wē pōl ēak wē. Mop pōrōa kepōnōtē omp ak ul koolōtōk ket ēautē ōkōt waēak wēa. Kēere wot kan pōt omnarōa ōkōrō.

⁸ Ēn pitēm kepōn ēpōt, ōngōrōaatē ōk wali panēēt orōēēa. Kē pōt kent nga laionōrōaatē ōk panēēt orōak wēa.

⁹ Pitēm ripatē aini ngilōatē ōkōt ngep ēēēa. Ēn wer pōt pol osōrōa teēt ngaōōk sēpēnēak kaaratē nga ē raare wisangōt wa wiin wak weruak yesēn u kēsang ya pōl ya.

¹⁰ Pitēm suut kōrngap pōrōaatē ōkōt. Wap nantta omnarō wesirēn kēēm kat wiipnaat suutē orōēēa. Pitēm nga ēēpna pōt suutē wēa pōtōk omnarō ngoon 5 pōrōa ōngpōk utpet yemowas.

¹¹ Pit pourōa kepōnōōk omēn omp ak namp wēa. Omp ak pōp ensel yang ōngōp wali panēōōkē ngarangk wēa pōp. Pim yapinte Yuta ngōntak

Apaton, Krik ngöntak Apolion, ën tiarim ngöntak, “Omën omnant pout utpet yewesaup,” pël ape-naap.

¹² Këlangön kësang wet kaalte, kuup 5 pöökë mëngkën oröa pöt peene pet yair. Këlangön munt nentepar om wia, ënëmak orööpnaatepar.

Ensel 6 pöpök kuup mëna

¹³ Ensel 6 pöpök kuup mëngkën ne kat wiin ngön nent yeem ya. Ngön pöt ur Anutuun kiri yaalmëaö koolötök ket ëa pim itëkëel wieëa pöta tepön 4 pötëëlaan oröak

¹⁴ ensel 6 kuupö wak wëa pöpön epël ök yema. “Ensel utpet 4 ëak i kësang Yupretis pël yema pömeri pouuk wii kaatak wë piporö kan wes mëen sëp,” pël yema.

¹⁵ Pël yemaan ensel 4 pörö kama wël ë yemoulmë. Ensel utpet pörö, yangerakë omën pourö kom ëak rongan 3 wesak nentakörö mën wel mowiin nenteparëerö om öpnaat pël maan pitök ya pöt mëmpënëak kor wakaima. Pitëm pël ëëpna pöt ngaantakëer krismakiire ngoon, këtrea aöa akun pöt mowia.

¹⁶ Pit pël ëëpënëak kan yesën pitëm nga omën pol osöröa rangk wel aisëak wëa pörö pitring yes. Pitëm sareet pöt kësang pan, 200 milion pël aan kat yawi.

¹⁷ Ën pol osöröere pitëm rangk omën wëa pöröen wangartak epël itenaut. Omnaröa ripatë aini ngilöat ngep ëëëa. Ën pötë retëngretëng ëëëëa pöt epot. Köp möaare kunöm ka uraare kop retëng ka ura pöt pitëk pangk ëëëa. Pol osöröa kepönöt kent laionöröa kepönötë ök seëa. Pël ëën pitëm

këmötëaan kël kop retëng ka ura es yokota nantring koulöpre wëlëngöt yaaröa.

18 Pël ëën pitëm këmötëaan kël kop retëng ka ura es yokota pötring koulöpre wëlëngöt yaaröa 3 pötök yang omnaröa naëaan rongan nentak wëa pörö pourö mën wel yawiin nenteparë wëaurö om wë.

19 Pol os pöröa weëre kosang pöt këm kanre suuté wieëa. Pitëm suut pöt kamalöröa ököt, kepönötta wëa. Su pötökta omnarö möak utpet wasëpnaat.

20 Pol osöröa këmötëaan omën utpet 3 ëak oröa pötök yangerak omën rongan nentak wëa pörö mën wel wiipënëak nentepar pël naalmëen yaë. Pël yaëen omën wel nawiin pörö lup kaip tiak utpet yaaut sëp newasën yaë. Pël ëak pitëm omp ak kaar aini koolre siluwaare parasötök ket ëëre këraare këlötök omën kön ket ëaut sëp newasën yaë. Omën kön pöt itaampööre kat wiire kan ing ë pël naën yaëetak pötëen yaya yamëëa pöt sëp newasën yaë.

21 Pël yeem nga ëëre kemp ë, wëwë utpet öngre omp nga ëëre omën köntak këkain ë pël yaaö pötta sëp newasën yaë.

10

Enselëpök Son pep newer mangkën na

1 Ne omën pöt yaaröön itenak kaalak itaangkën kutömweriaan ensel weëre kosangring munt namp yeira. Pöp pim koröpöök kepilöt pe ëën kepönöök iere kasirö wesirak wëa. Këëre wot kante pöt ket ket ëak mëak ëwa ëëëa. Ën ingesiar pöt es wëlëngöökë ököp.

2 Pi pep kot newer wilak wali weëa. Pim ing yaapkëewes i kaöökë rangk mësëak katnëewes yangerak mësëak wëa.

3 Pël ëëaupök kent laionöpë ya pöl maap ngön ë olëak aan tangre kaö akun 7 ëak yera.

4 Pël yaëën ne ngön pöt retëng ëëmëak yeem kat wiin kutömweriaan ngön nent epël yenëa. “Tangre kaö akun 7 ëak yeraan ngön aan kat wian pöt ni retëng ëënganëp könöök wa wi,” pël yenëa.

5 Pël yeneaan ensel nem wet rëak itaangkën pim ingesiar nas i kaöökre nas yangerak pël ëak wëën nem itena pöpök kaalak o kutömweriil pim mor yaapkëewes ngaarëk wesak wë

6 Anutu wakaim öpnaapök, kutömre yang, i kaöre omnant pötë wieëa pöt pout ket ëa pöpë yapintak ngön kosang wesak epël ya. “Anutu pi omnaröaan kor wakaimaup, kaalak naöpanëëp.

7 Ensel 7 pöpök pim kuupö mëngkën Anutuu ngön ëlëëp ngaanëër pim inëën ru tektek ngön yauröen ök mëëa pöt kë orööpnaat.”

8 Pël yaan ngön nem wet rëak kutömweriaan ök neaan kat wian taptak kaalak epël yenëa. “Ni së ensel i kaöökre yangera rangk taueëa pöpë pep wilak wali wak öpna pöwer kama öm.”

9 Pël neaan ne enselëpë naë së pep kot pöwer nampënëak maan pi epël yenëa. “Ni pöt num. Nim këmtak kapulak kant mënak numë pöt ngëntötë ök misëng pan ëëpnaat. Pël ëëpnaatak yaatak së wieë welakre kakam ëak nga ëëpnaat.”

10 Pël neaan ne pep kot pöwer pim moresiaan wak naut. Pël ëën nem këmtak kapulak nëën ngëntötë yaë pöl misëng pan ëaut. Ën yaatak së

wieëak kaalak welakre kakam ëak nga äaut.

¹¹ Pël ëën ne epël kat yawi. “Ni kaalak omën yang kaö nantë neenem ngönöt yaaöre pitëm omën omp aköröa naë orööpna pöt tekeri wesak maim öm.”

11

Omën naarök Anutuu ngönte ök apnaat

¹ Ne ngön pöt kat wiaan nampök sungkör ök naö nenak epël ök yenëa. “Ni wal ëak ök epö wak së Anutuu ngönën tup kaöetere ur pimëën kiri yaalmëautak epööring ök wiak omën pörek piin yaya yamëëa pöröen sangk kelum.

² Pël ëëmëetak tup ka ngëengkta ëm pipö ök wiinganëp, mosëp. Pipöökë öngpök Anutuuk omën ngönën köpëlöröaan yaö maan pit Yerusalem ka ngëengk pipö krismaki nentepar nent ngoon 6 pöröa öngpök ka pö utpet wasëpnaat. Pötaanök ök wiingan.

³ Pël ëën omën naar nem songönte tekeri wasëpnaan wes mëëmaat. Ne piarip wes mëën nem ngönte tekeri wesak apnaataan kaplak ilaim wëën krismaki nentepar nent ngoon 6 pörö pet irëpnaat.”

⁴ Omën pöaar këra olip rikötre rampeetë rangina yaë pöl yangera pepap, Aköp, pim ëöetak ëwa yaaauwaar.

⁵ Omën namp piarip utpet mowasëpën wesak elmëëpna pöt es wëlëngöörar piarpim këmteparëaan oröak mokotöpnaat. Yaap, omën piarip utpet mowasëpna pörö akun tapëtakëër wel wiipnaarö.

⁶ Piarip kutömweriaan weëre kosang wak akun piarpim Anutuu ngönte aö sëpna pötë piaripök

kopi nepelën eëpënëak maan nepelën eëpnaat. Weëre kosang tapööring i epot pout kaip tiak omën i sëere yangerak omnant këere ngaat orö pël eëpënëak maan pël eëpnaat. Piaripök ya pöt mëmpënëak kön wiipna pöt pangk eëpnaat.

⁷ Piarpim Anutuu ngönte ök aö seimeë së pet irëpna pötak animaö utpet nga namp yang öngöp wali panë pöökaan oröak piaripring nga elak puuk piarip mën wel mowiipnaawaar.

⁸ Pël eën omën pöaarë sokuraar ka kësang piarpim Aköp këra yetaprak möön wel wia pööké kamtaöök mowiin wiaapnaat. Ngön nokoliitak ka pöön Sotomre Isëp pël ya.

⁹ Pël eën omën möönre koröp naöre naö, ngön nerere ner, yang poutëaan narö wais erën ëak piarpim sokuraarön iteneimeë së kët 3re ën kët kaö nent pël sëpnaat. Pël eëpnaatak omën nampökta itenak wak së welaaröa yangaöök moweerëpnaaten kuure mak nemaan eëpnaat.

¹⁰ Pël ëak yangerakë omën pourö piarpim wel wia pötaan yak ërëpërëp ëak këere kaömp ngawinak nener omnant yowe mampnaat. Pöt yangerakë omën pörö utpet yaëën Anutuu tektek ngön yaaö omën pöaarök pit këëmre këlangön menak utpet moweseima pötaanök.

¹¹ Ën kët 3re kaö nent won sëën Anutuuk pim omën wel wia pöaar wëwëeta ëmö mangkën kaalak öp sak tauaan omën pourö piaripön itenak kas kësang pan yaë.

¹² Pël eën piarip kat wiaan kutömweriaan ngön naö ngön ëak epël yema. “Arip e ngaarëkël apreë.” Pël maan piarip kan aprö is kutöm kepilötë öngpök

ilëak yesën kööre tokörö itenaut.

¹³ Pël èen akun tapëtakëer moup nempel möak ka kaöaöökë lup ner utpet wes yoolaan lup 9 ëak om wia. Moup yamöön omën 7,000 ka kaöaöökë lup nerak wëaurö wel wiin, lup 9 pötë wëaurö om wë omën pörek oröa pöten itenak kas kësang panë yeem Anutu kutöm pepapë yapinte wak isak yema.

¹⁴ Këlangön kësang 2 kuup 6 pöökë mëngkën oröa pöt peene pet yair. Këlangön 3 ënëm panë pöt, peene tapët orööpnaan yaë.

Ensel 7 pöpök pim kuupö mëna

¹⁵ Ensel 7 pöpök pim kuupö mëngkën kutömwieriaan omën naröak ngön ë olëak epël ya. “Tiarim Aköp Anutu pi Kristo pim Yaö Mëëaupring omnaröa kaö sak wë om wakaim öpnaap.”

¹⁶ Pël yaan ngarangk 24 Anutuu ëöetak pitëm omp ak urötë wel aisëëëa pörö pit rar rë mowesirak tok oriak Anutuun yaya yamëem

¹⁷ epël yema.

“O Aköp Anutu, weëre kosang pout wieëaup,

ni ngaanëer wakaimaupök peeneeta wëen.

Ni nimtë weëre kosang kësangö wak omp ak sak ngarangk yaalniin.

Pötaanök ten niin yoöre ërëp yeniak.

¹⁸ Yangerakë omën niin köpëlörö ya sangën elnieim wë,

ën nim pitëmëen ya sangën elmëëmë pöt yok peene yaarö.

Nim omën wel wiauröa wël ëak kangut mampë pöteta yok yaarö.

Peene nim inëen ru tektek ngön yaaö omën pöröere
 ën nim omën pourö, kotre kaö,
 niin kasinkasin yaalnia pörö pit ompyaö kangut
 mampëep.

Pël ëak omën yang omnarö utpet yewesauröeta
 utpet mowasumëep.”

¹⁹ Pit ngön pöt ök më pet yairën Anutuu
 tup ngëengka kaöet kutömweri wia pöt kan tëen
 ne itaangkën Anutu pim umkek Mosesë ngön
 kosangöt wieëa pöt tup pöta kakaati wia. Pël ëen
 ne itenaan kent tangar mënak tangre kaö rëak
 moup möak kopi kësangpel ëp ulöpötring yepel.

12

Öng nampre kamal kësangëpë ngönte

¹ Ne itaangkën kutömweri retëng kësang nent
 yaarö. Pöt öng nampök pim koröpöök këtëpök
 ulpëen ket ëak mëak wëa. Ngoonöp pöt pim inge-
 siarë iri wëa. Ën kepönöök pöt ari 12 pötök ul ket
 ëak waëak wëa.

² Pöp ru yak wë wilëpënëak lel yailën këlangön
 kësang kat yawiem merek ya.

³ Ën omën munt nantta kutömweri taprek yaarö.
 Omën pöt kamal kësang panë nemorë ök sak wëa.
 Pömor köp möaumorök pim kepönöt 7 ëak wëen
 watöt 10 ëak pötëaan oröëëa. Ën omën omp aköpë
 ulöt 7 ëak pim kepön 7 pötë waëëëa.

⁴ Pim su pömentök kutömweri möak ari tit nent ti
 olaan tit nentepar pëen om wë. Pël ëaan kamal pöp
 öng ru wilëpënëak yaaö pöpë itëkeël së nga kor taö
 yeö. Öng pöp rungaap wilën pi wa nëmpënëak pël
 yaë.

5 Pël ëën öng pöpë yokot ënëmak yangerkë omën pourö weëre kosangring ngarangk elmëëpna pöp yawil. Pël ëën akun tapëtakëër pit rungaap teëntom panë wak yes, Anutu pim omp ak urtak wel aisëëëa pöpë ngësë.

6 Pël ëën öng pöp kan kas së yang lup omën won ner, Anutuuk mangkën krismaki nentepar nent ngoon 6 ëak wëën ngarangk ëak kaömpre omnant mampënëak yema.

7 Ne kaalak itaangkën kutömweri nga kësang panë nempel yaarö. Nga pöt Maikelre pim enselöröak kamal kësang pömorre enselöröaan nga yaalmë. Pël yaëën pit kangiir yaalmë.

8 Pël yaëën Maikelre pim enselöröak pit il mowesak, “Ar e kutömweri yok pangk naöngan,” pël yema.

9 Pël mëak kamal pömor wa yangerk yemoola. Pöp kamal wet ngaanëër pan wakaimaupök yangerkë omën pourö morök yaalmëaup, Seten pöp. Piire pim enselörö wa yemoola.

10 Ën ne kat wiin kutömweriaan ngön naö ngön ë olëak epël ya.

“Peene Anutuuk tiar utpetetakaan kama yanu.

Peene pim weëre kosangöök omnant pout il mowesak pi Aköp pël sak wë pöt pet yaalni.

Ën pim Ruup Kristo puukta pi kaö sak wë pöt pet yaalni. Pöta songönte epët.

Seten pi tiarim Anutu pim ëöetak tiarim karuröaan röökre kët poutë ngön utpet wesak yamëëa pöp piaripök kutömweriaan wa yemoola.

11 Tiarim karurö Yesu Kristo, Sëpsëp Ruupë i il olëa pötak weëre kosang wak pim ngönte ök aimeë Seten il mowesa.

Pit pitëm wëwëat keimön naën Anutuu ngönte taë wes wak wëën pitëm kööre toköröak mënaurö.

12 Pötaanök kutömweri wëaurö ar ërëpërëp ëëë.

Ën yangerakre i kaöök wëauröaan yaköm pan.

Seten pi pim akunet ëwat wë yak ya sangën ëën arim naë oröak nga kaö elniipnaan yaë.”

13 Kamal kësang pöp pi yangerak wa moolëa pöten kön wieë öng yokotup wila pöp utpet mowasëpënëak nga yes.

14 Pël yaëën Anutuuk öng pöp int tup wereweriarë ök neweriar yemangk. Pöt pi kamalöpë naëaan kas wal ëak yang lup omën won panë nerek së wëën Anutu ngarangk elmëak këëre kaömp meneim wëën krismaki 3 ën ngoon 6 pël sëpënëak yemangk.

15 Pël ëën kamal pöpök öng pöp i wak sëpën pël kön wiak köm ngës olaan i kësang nemer nga urak ënëm yes.

16 Pël ëën yangerak öng pöp kaamök elmëak këm nga ëën i kamalöpë köm ngës olëa pömer ngemë ilëak won yes.

17 Pël ëën kamal kësangëp pi öngöpön ya sangën ëën pim ru wet rëak wilaö muntarö Anutuu ngön kosangöt ngaarëk wëëre Yesu pim omnant tekeri wes mena pöt taë wes wak wëaurö nga elmëëpënëak yes.

18 Pël ëak kamal kësang pöp i kaöökë pisöök tauak kor wë.

13

Animaō nga naar orōa

¹ Ne omēn pōtōn itenaan animaō nga namp i kaōōkaan yaarō. Pōp pim kepōnōt 7 ēak wēēn watōt 10 ēak pōtēaan orōēēa. Omēn omp ak ulōt 10 tapēl ēak wat 10 pōtē waēak wēa. Pim kepōnōtē yapin Anutuun utpet wesak yaaō nant wieēa.

² Animaō nga nem itena pōp pi pusi kēsang nga namp lepat pēl ya pōpē ōkōp. Ingesiar pōt imēn nga namp pea pēl ya pōpē ōk. Ēn kēm pōt kent nga laionōpē ōk. Animaō nga pōp kamal kēsangēpōk pim weēre kosangō menak pim omp ak urtak wel aisēēē yangērakē omnarō ngarangk ēēpēnēak yema.

³ Pēl yaēēn ne itaangkēn animaō nga pōpē kepōn naō omnarōak wisang ēak mēnaupē kepōnōōkē ōk seēa. Pēl ēautak ēmpōlō yok pu wariin yaap sak wēēn omēn pourō pōten itenak yaan sak ēak pim ēnēm yes.

⁴ Pēl ēak omnarō kamal kēsang pōpōk pim weēre kosangō animaō ngaap mena pōtaan kamalōpōn yaya mēak animaō ngaapōnta yaya mēak epēl ya. “Talēp animaō ngaapē ōk weēre kosangring wē? Ma talēpōk pi il mowasēpēn? Won pan.”

⁵ Kamal kēsangēpōk animaō nga pōpōn, “Ni Anutuun yapinte wa ngep elmēak utpet wesak mam,” pēl ōk maan Anutu kuure mak yema. Pēl ēak pi krismaki 3 ēn ngoon 6 pōrōa ōngpōk yang omnarō ngarangk elmēēpēnēak animaō ngaapōn tapēl yema.

6 Pël maan pi Anutuun utpet wesak mëak yap-
inte wa ngep elmëak pim wëautere kutömweri
wëauröenta utpet wesak yema.

7 Pël ëak animaö nga pöpön Anutuuk pim
omnaröen kööre tok elmëak puuk il mowesak
omën möönre koröp naöre naö, ngön nerere ner,
yang poutëerö ngarangk elmëëpënëak kuure mak
yema.

8 Pël maan yangerakë omën pitëm yapinöt wëwë
kosangta pepeweri retëng naën ëa pöröak animaö
nga pöpön yaya yema. Pep pöwer yang epër
naaröön wiaan Sëpsëp Ru ënëmak mën wel wia
pöpök omën wëwë kosangtak öpnaaröa yapinöt
retëng ëauwer.

9 Katringöröak ngön epët këëkë kat wiin.

10 Anutuuk omën namp wii kaatakën yaö ëëpna
pöp yok sëpnaap. Ën nampön kööre toköröak
mëmpënëak yaö ëëpna pöp mëmpnaap. Ngön pöt
ngönëntak wia. Pötaanök omën ke pilöt Anutuu
omnaröa naë jaaröön pöt kosang sak wë piin kön
wi kosang yewesaut taë wes wak öp.

11 Ne kaalak itaangkën animaö nga munt namp
yangera öngpökaan jaarö. Pöp wat naöörar wëa
pöörar sëpsëp ruuröaatë ök. Ën pim ngönaak yaaö
pöt kamal kësangöröa ngönötë ök kaö yaaup.

12 Animaö nga 2 pöpök munt wet kaal pöpë
weëre kosang pout wak wëa. Pël ëak pi wet kaal
pöp kaamök ëak yangerakë omën pourö animaö
wet kaal pim kepön naö mëngkën wel wiin ëmpölö
pu wariaö pöpön yaya mapënëak yamëëaup.

13 Animaö nga 2 pöpök ya it ngölöp ke nentere
nent mëneim wë. Pël yeem kutömweriaan esuwes

wes mēen yangerakēl yeiraan omnarō iteneim wē.

¹⁴ Pēl ēēn Anutuu kuure mak mēēaul animaō nga wet kaalēpē itōök ya it ngolöpöt yamēngka pötök yang omnarōen morök epēl maim wē. “Ar animaō nga ngaantak öp wesirēn wel wiak kaalak öp wēaupē könöp ket ēak kön pöpön yaya maim ön.”

¹⁵ Pēl yaēēn Anutuuk kat mowiin puuk animaō kön ket ēa pöp wak kēm muntön momöön ngönaak yaan omēn animaō kön pöpön yaya nemaan yaē pörö mēneim wē.

¹⁶ Pēl ēak animaō nga 2 pöpök omēn pourö kotre kaö, monere urömaringre il ngentingenti yaaö, omēn yaap wēaöre ēn inēēn yaaö pourōen maan animaō wet kaalēpē yapinte pitēm mor yaap-kēētēere ē kosatē wi pet yair.

¹⁷ Namp animaō pöpē yapintere saareet piik nawiin ēēn pöt animaō pöpök omēn pöp omnant sum ēere omnarōakta pim naēaan sum ē pēl naēpan pēl yema.

¹⁸ Animaō nga pöpē yapinta songön pöt epēl kēēkē kön wiipa. Yapin pöt saareet 666 pēl wia. Pötaanök omēn namp kön wetete wē pöt saare epēt sangk kelak pöta songönte ēwat sēp.

14

Omēn 144,000 pörö tan ngolöp nent ēa

¹ Ne kaalak itaangkēn Sēpsēp Ruup Yerusalem kak Saion rosiraōök taueēa. Pēl ēēn omēn 144,000 Sēpsēp Ruupre Pepap Anutu piarpim yapintepar pitēm ē kosatē wieēa pöröeta piiring wēa.

² Pēl ēēn ne kat wiin kēm ngön nempel i kēsang nant nga yaurem kuk aöre tangre kaö kēsang rē pēl yaē pöta ök kutömweriaan yaarö. Ngön nem

kat wian pöt omēn selap intö tang yamööna ya pöl äaut.

³ Omēn 144,000 pörö Anutu pim omp ak urtak wel aiseēa pöpre kutöm omēn mor kong nent wēwēetaring pöröere ngarangk 24 pöröa ēöetak taueē tan ngolöp nent aim wē. Tan ngolöp pöt omēn muntaröak ewat nasēpan. Omēn 144,000 Anutuuk yang omnaröa naēaan pimēen kama wa pöröakēer pangk ewat sēpnaat.

⁴ Omēn pörö pit öngörö mēsəl naēn wonörö. Pit yaap wēwē wotpil wakaima. Pəl ēēē Sēpsēp Ruupē ngönte ngaarēk wak kaatē ya mēmpö seima. Omēn pörö Anutuuk pöta kangiir pit yang omnaröa teköökaan kama waurö. Pəl ēēn Anuturē Sēpsēp Ruupē ingre moröröa wotöökörö pəl sak wēa.

⁵ Pit ngön kaar aöre utpet nent ē pəl naēn, won.

Ensel 3 pöröak ngön nant ök mēea

⁶ Ne kaalak itaangkēn ensel munt namp mopöök wal äak yesēn itenaut. Pöp möönre koröp naöre naö, ngön nerere ner, yang poutēeröen Anutuu ngön ompyaö wiakaim wiaapna pöt ök mapēnēak yes.

⁷ Pəl äak pi ngön ē olēak epəl ya. “Anutu pim omēn pourö kom äak ngön yaatak niulēepna akunet yok yaarö. Pötaanök piin kas yeem ping wesak maē. Pi kutömre yangre i kaöre kölok pout ket ēa pöpön yaya maē.”

⁸ Pəl aö yesēn ensel munt namp pim ēnēm yesem epəl ya. “Kat wieē. Papiilon ka kaöaö omēn naröak yok utpet yewas. Yaap, pit utpet panē wesak tööl yoola. Omēn ka pöök wēa pörö öng omp nga yaaö nampē wain iit omnarö mangkēn nak piiring

utpet yaë pol pitëm utpet yaaö pöt yang omën pouröen rë moulöön ulöl sa. Pötaanök pitëm ka kaöaö töölön pitta kö yes.”

⁹ Pël aö yesën ensel munt 3 pöp wet kaal pöaarë ënëm yesem ngön ëak epël ya. “Omën narö animaö nga pöpre pim omën kön ket ëaupön yaya mëak pim yapinte pitëm moresiire ë kosaöök wiaapëna pörö

¹⁰ omën nampë wain iit mangkën nak kön irikor yaë pöl Anutuuk pitën ya sangën elmëen këlangön kat wiipnaarö. Kot nent wiap naalmëëpan, ya sangën kaö elmëak kël kop retëng ka urauuk es yokota pörek wes mëen ensel ngëëngköröere Sëpsëp Ruupë ëöetak këlangön kaö pan kat wiipnaarö.

¹¹ Es pitëm këlangön kat mowiipna pöwes nariin om yokotön koulöpö kët ëlötë o ngaarëk aprö seim öpnaat. Omën animaö ngaapre pim omën kön ket ëaupönta yaya yamëem pim yapinte pitëk wiaapna pörö röökre kët poutë këlangön kat wieim öpnaarö.”

¹² Pël ëëpnaat pötaanök utpet ke nentere nent Anutuu omën pim ngön kosangöt ngaarëk wëëre Yesuun kön wi kosang wasö pël eim wëaurö arim naë yaaröön pöt kosang sak ön.

¹³ Ne kaalak kat wiin ngön nent kutömweriaan epël yenëa. “Ni ngön epël retëng ë. Omën Aköpë naë rë olëak wë akun eptak ngës rëak wel wiipna pörö ërëpërëp ëëpnaarö.” Pël yaan Ngëëngk Pulöök epël yenëa. “Yaap pan. Pit wel wiin pitëm ya mëmpnaatë kangut Anutuuk mampnaarö. Pötaanök yok pangk pitëm ya kaö mëmpna pöt pet irak kë yesem ërëpërëp eim öpnaarö.”

Enselöröa omnarö koirëpnaata ngönte

14 Ne ngön pöt kat wiak kutömweriil itaangkën kutöm kepil kölam kësang ner wiaan itenaut. Pël èen kepil pöra rangk namp wel aisëeëa. Pöp omnaröa ököp, pim kepönöök omp ak ul koolötök ket ëa nent waëak moresi öp nga panë newer wak wëa.

15 Pël èen ensel munt nampök Anutuu ngëengk tup kaöeta kakaatiaan oröak ensel kutöm kepilta rangk wel aisëeëa pöpön maap ngön ëak epël yema. “Yangerakë kaömpöt köp sëen tiak kama ömë akunet yok jaarö. Pötaanök ni së öpwerring ti.”

16 Pël maan ensel kutöm kepilta rangk wel aisëeëa pöp së pim öpwer yangerak wesirak kaömp köp saut yati.

17 Pël yaëen ne itaangkën ensel munt namp kutömweri ngëengk tup kaöeta kakaatiaan öp nga panë newer wali wak jaarö.

18 Pël èen ensel munt Anutuun kiri ar yaaö urtak esuwesi ngarangk yaaupök pötakaan oröak ensel öp nga panëewer wali wak wëa pöpön maap ngön ë olëak epël yema. “Yangerak wii wain ulöpörö köp sak wë. Pötaanök së öpwerring tö.”

19 Pël maan ensel pöp së pim öpwerring yangerakaan wain ulöprö töak rongan yaë. Pël ëak wain ulöp pörö ing mësaan iit oröak sëpënëak wa kap kësang këlötök ket ëa nenta öngpök yewesir. Wain ulöpöröa ing mësaan iit oröak sëpna pöt Anutu pim omnaröen ya sangën elmëepnaata ök ëëpnaat.

20 Pit Yerusalem kaöökë ka tomök wii wain ulöp pörö kap kësang pötak wesirak ing mësaan pötakaan omën iit oröak i yaapötë ök yaë. I pöt oröak kaö wetak omnaröa kepönöt il yewas. Rëeptakaan opetakë waliit 300 kilomita pöta ök.

15

Ensel 7 pöröak omën utpet panë nant 7 tapël äak wali wak wëa

¹ Ne itaangkën kutömweri retëng kësang munt nent oröak wëen itenak yaan saut. Ne itaangkën ensel 7 pörö omën utpet panë nant 7 tapël äak omnarö utpet mowasëpnaat wak wëa. Omën utpet pöt oröön ënëmak kaalak munt nant naaröön ëëpnaat. Anutu pim ya sangënte pörökök pet panë irëpnaat.

² Pël ëen ne omën kësang i kaöökë ök nenten itenaut. Omën pöt könitweri öktak esuwesi köp möak wë pöl ëëëa. Ën omën animaö nga pöpring nga elak piire pim omën kön ket ëaupre pim yapinta saareet il wesa pörö Anutuuk pim intöat mangkën wali wak i kaö könitweri ök pöökë ëöök taueëa.

³ Pël ëëë Sëpsëp Ruupëen tan nent Moses Anutuu inëen ruupë tan pöta ök epël aim wë.

“O Aköp Anutu, ni weëre kosang pout wieëaup.

Nim ya pout kosang kaö panëët, pölöpringöt.

O omën pouröa Omp Aköp,

nim wëwë pötakëer wotpil ompyaö panëët.

⁴ Aköp, nimënt tapöpökëer ngëëngk panëëp.

Pötaanök ten omën pourö niin kasinkasin elniak nim yapinte wak isak nianaat.

Nim wotpil yewesa yaat tekeri panë oröak wia.

Pötaanök yang kaö poutëaan narö nim naë wais yaya niapnaat.”

⁵ Tan pöt pet irën ne kaalak itaangkën kutömweri ngëëngk tup kaöet poë koröpötök ök rëa pöta kakaati ngëëngk tup panë pöt kan tē wieëa.

⁶ Pël ëen ensel 7 pörö omën nant omnarö utpet mowasëpnaat 7 tapël äak wak tup ngëëngk panë

pöta kakaatiaan yaarö. Pit ulpëen wali ompyaö kewil won, ëwaëwa yaaö nant mëak wëa. Pël ëak yepat koolötök ket ëa nant pitëm ripatë wirö rëwarök rëak wëa.

⁷ Pël ëen kutöm omën mor kong nent wëwëetaring pöröak söwar koolötök ket ëa 7 ëak ensel 7 pörö yemangk. Söwar pötë Anutu wëwë kosangtaringëp pim ya sangënöt peö ëëëa.

⁸ Ën Anutuu ëwaare weëre kosang pö es koulöpöökë ök sak tup ngëëngk panëetak wiaan es koulöp pö kakaati peö ëaan omnarö pörek ilapnaat pangk naën. Ënëmak utpet 7 enselöröak wak yewais pöt pet irëpna pötakëer ilapnaat.

16

Anutu pim omnaröaan ya sangënöt söwar 7 pötë wieëa

¹ Ne kat wiaan tup ngëëngk panëëta kakaatiaan ngön nent ensel 7 poröen epël ök yamëem ya. “Ar söwar 7 pötë öngpök Anutuu ya sangënöt wia pipot kömen yangerak olaë,” pël yema.

² Pël maan ensel kopët pöpök pim söwarweri wieëaut wak së kömen yangerak yoola. Pël ëen omën animaö ngaapë yapinte pitëk wiak pim omën kön ket ëaupön yaya maima pöröa naë ëmpöl utpet kësang panë nant orö morëen këlangön kaö kat yawi.

³ Ën ensel 2 pöpök pim söwarweri wieëaut i kaöök kömen yoola. Pël ëen i kaö pö kaip tiin omën wel wiauröa iitë ök koröp oröön omën i kaöök wëa pörö wel wi won yes.

4 Pël yaëen ensel 3 pöpök pim söwarweri wieëaut i kësangötëere kölokötë kömen yoola. Pël ëen pötta kaip tiin omën i koröp yaarö.

5 Pël ëen ne kat wiaan ensel i pout ngarangk yaaö pöpök Anutuun epël yema.

“O Ngëëngkëp, ni wakaimaupök wëen.

Nim kangut yemengka yaat wotpil yamëngkaup.

6 Ommarök tektek ngön yaaö omënere nim omën muntarö mën wel wiin pitëm iit oröak ngen-tieimaut.

Pötaanök omën utpet pöt eima pörö nuuk omën i epot mangkën yen.

Nim wotpil yewesa yaat yamëngkën pitëm ut-petatë kangut yeö.”

7 Pël yemaan ne kat wiaan kaalak ur Anutuun kiri yaalmëautakaan ngön nent ngön ëak epël ya.

“Yaap, Aköp Anutu weëre kosang pepap,

nim ya yamëngkaut wotpilre ompyaö yamëngkaup.”

8 Ën ensel 4 pöpök pim söwarweri wieëaut këtëpë rangk kömen yoola. Pël ëen Anutuuk këtëp nga panë wesak maan ommarö es kotöpënëak yema.

9 Pël ëen këtëp nga panë wesak maan ommaröa koröpötë es mokotön Anutu utpet pöten maan pit utpet mowasëpënëak oröa pöpön utpet wesak yema. Pit lup kaip tiak piin ping wesak nemaan yaë.

10 Ën ensel 5 pöpök pim söwarweri wieëaut animaö ngaapë omp ak urtak kömen yoola. Pël ëen animaö pöpë ikanöök omën wëen ngarangk elmëeima pöröa naë koö yoola. Pël ëen omën pörö këemre këlangön kat yawiem kë kant mënak wë.

11 Pël äak pitēm ėmpölre kēemre kēlangōn yaaō pōtēēn Anutu kutōmweri wēaupōn utpet wesak yema. Pitēm utpet yaaut kasēng menak lup kaip natiin yaē.

12 Ēn ensel 6 pöpök pim sōwarweri wieēaut i kēsang nemerēn Yupretis pël yema pōmeri kōmen yoola. Pël ēēn i pōmer leep raan omēn omp ak kētēpē yengampiaul wēaurōa wais nga elēpna kanō yaarō.

13 Pël yaēēn itenaan urmer ōmōrōa ōk narō 3 äak yaarō. Namp kamal kēsangēpē kēmtakaan, namp animaō ngaapē kēmtakaan, namp animaō nga munt 2 pöpōn tektek ngōn yaaō kaar omnamp pël yema pöpē kēmtakaan pël äak yaarō.

14 Urmer pōrō Setenēērōak omēn it ngolōp ke nentere nent yaaurō. Pit yang ēl epotē omp akōrōa ngēsē yes. Pitōk omēn omp ak pōrō Anutu weēre kosang pepapē akun kaōaōök nga elēpnaan wa rongan elmēēpēnēak yes.

15-16 Pël äak sē koirak yang lup nentak wa rongan yaalmē. Yang lup pōta yapinte Yuta ngōntak Amaketon pël ya.

Pël yaēētak Kristook epël ya. “Kat wieē. Ne kēkain omnarōa yaē pōl ēlēp waisumaap. Pōtaanök namp pi ka uraan kēkainēpök wais pim poē korōpō wilak sēēn yool wē omnarōa ēōetak ēō ēēpanēēn itit ngarangk ēēpna pöp ērēpērēp ēēpnaap.”

17 Ēn ensel 7 pöpök pim sōwarweri wieēaut mopōök kōmen yoola. Pël yaēēn tup ngēēngk panēētak omp ak urtakan ngōn kosang nent epël

ya. “Nem omën utpet pipotring omnarö yamëngk pöt peene pet yair.”

¹⁸ Pël yaan kent tangar mënak tangre kaö yeraan moup yamö. Moup pömpel kësang panëëmpel ngaan ke pël nent möön itnaangkën äautak peenök yamö.

¹⁹ Pël ëen Papilon ka kësang pö luptak weerak 3 wasën omnaröa kaat tööl ngentiak utpet yes. Pöt Anutuuk Papilon omnaröa utpet yaautön kön wiak omën nampë muntap wain i ngaat mangkën nak këlangön kat yawi pöl pitën ya sangën kaö elmëen utpet yes.

²⁰ Yanger moup kësang yamöön i kaö kusöt mop wiak sëen rosiratta won yes.

²¹ Pël ëen kutömweriaan kopi kësang yepelën ëp ulöp kësangöt omnaröa rangk ngentiin këlangön kaö kat yawi. Ëp ulöp kopët nemesi könömët omnaröa könömta ök. Pël ëen pötök utpet panë mowesa pötaanök omnaröak Anutuun utpet wesak yema.

17

Öng omp nga yaaup pi sum utpet wa

¹ Ne omën pöten itenaan ensel 7 äak söwar nant 7 tapël äak wali wak wëa pöröakaan nampök wais neen epël ök yenëa. “Ni wais. Pël ëen öng omp nga ë yaë pöp pim utpetatë kangut Anutuuk mangkën öpnaatön pet elniimaan. Öng pöp pi ka kaö i kësangötë ëöök wieëa pö.

² Yang omp akörö pit öng pöpring utpet yaurö. Ën omën yaapöröeta sëen öng pöpök wain iit mangkën nak kön irikor äak piiring utpet tapël

yaurö. Pötaanök Anutuuk utpet kangut mamp-naat.”

³ Pël neaan Ngëengk Pulö pim weëre kosangööring nem naë oröön ensel pöpök ne mësak sê yang lup omën won nentak yeneulë. Pël ëën ne pörek wë itaangkën öng namp animaö nga köp möaö nampë rangk wel aisëëëa. Animaö pöpë koröpöök yapin Anutuun utpet wesak yaaö nant kësang retëng ëëëa. Ën pim kepönöt 7 ëäk wëën pötë watöt 10 ëäk oröreëa.

⁴ Öng pöp ulpëën köp nentepar möa namp mëäk polre kal ëäk ë rangi ompyaut pim koröpöök pangk ëäk wëa. Pël ëäk kelön koolötök ket ëa nent wali weëa. Pöta öngpök pimtë omp nga yaaüta utpet kamp yaaö kömkëënringöt peö ëëëa.

⁵ Pël ëäk pim yapin ëlëëpët ë kosaöök retëng ëëëa. Pöt epët. “Papilon ka kaöaö, öngre omp nga yaaöre utpet kömkëënringöt yaaö pötë ël panëëp.”

⁶ Ne itaangkën öng pöpök Anutuu omnarö mënak pitëm iit nak kön irikor ëäk wë. Omën pörö Yesuu yapinte wak kaö wesak aima. Pötaanök pit mënak pitëm iit nak wë.

Ne öng pöpön itenak yaan panë saut.

⁷ Pël yaëën enselëpök epël yenëa. “Ni oröpmorëën yaan panë yesën? Nook niin öng pipopre animaö kepönöt 7 ëäk wëën pötë watöt 10 ëäk oröaupök öngöp köka ëäk wëa pöp piarpim songöntepar ök niamaan kat wi.

⁸ Animaö nim itenaö pöp ngaantak wëaupök peene won wia epop ënëmak kaalak yang öngöp wali panë pöökaan oröak apër sasa kö sëpnaap. Pël ëën omën yangerak öpna pöröa yapinöt wëwë kosangta pepeweri yang epër naaröön wiaan

retëng naën ëa pöröak animaö pöpön itenak yaan sëpnaat. Animaö pöp ngaantak wakaimaupök peene won wia ënëmak orööpnaap.

⁹“Pöta songönte këëkë ëwat sëpa. Pöt epët. Kepön 7 ëak wëa pël ya pipot rosir 7 pötönök ya. Öng pöp rosir 7 pötë rangk wel aisëëëaup.

¹⁰Ën kepön 7 ëak wëa pël ya tapötök omën omp ak 7 pörö pël ya. Pitëm naëaan 5 pörö wel wiin kopët nampökëer peene yangerkë omp ak sak om wë. Ën munt namp pi omp ak nasën won wë. Ënëmak pöp oröak akun kot panë nent öpnaap.

¹¹Animaö nga pöp ngaanëer wakaimaupök peene won wia, pöp piita omp ak namp munt 7 pöröak erën ëën 8 ëak wë kö sëpnaap.

¹²“Ën watöt 10 ëak nim itenaö pöt omën omp ak 10 pöröenök ya. Pörö pit peene omp ak nasën wë. Akun kot panë 1 aöa ke pil pötak weëre kosang wak animaö nga pöpring omën omp sak öpënaarö.

¹³Pël ëak omën omp ak 10 pörö pit kön kopët nent wieë pitëm weëre kosangre omnaröen ngarangk elmëëpna pöt animaö nga pöp kön wes mampnaat.

¹⁴Pël ëak pit Sëpsëp Ruupring nga elak pöpök pit il mowasëpnaarö. Pi omën isaö pouröa Kaöap, omën omp ak pouröa Omp Aköp. Pötaanök omën piiring öpna pörö, pim yas mëak pimtëën yaö ëën pim ngönte këëkë wesak öpna pörö pourö, piiring erën ëak yang omp ak pöröaring nga elak il mowasëpnaarö.”

¹⁵Pël neak kaalak epël ök yenëa. “I kësangöt öng omp nga yaaupë ëöök wel aisëëëa pöt omën

möönre koröp naöre naö, ngön nerere ner, yang poutëeröenök ya.

¹⁶ Ën watöt 10 ëak oröaan nim itenan pipot yang omp ak 10 ëak nem ök niaö pöröere animaö nga pöpre ëak pitök öng omp nga yaaö pöpëen kööre tok elmëepnaarö. Pël ëak pitök pi utpet mowesak ulpëenre poë koröp pim ë rangieëa pöt wa ilak keli moolëak yool moulmëepnaat. Pël ëak pim koröpre mësëp kaö nant nak nant es momarëpnaat.

¹⁷ Yaap, Anutuuk pimtë ngaantakëer kön wia pöl pitëm lupötë kön pout mangkën pit ya pöt mëmpnaat. Ya pöt pit kön kopët naö wieë omën omp ak sak öpëna weëre kosang pitëm pöt animaö pöp mampnaat. Pël ë seim Anutuu akun menautak pet irëpnaat.

¹⁸ Ën öng nim itenan pipop ka kësang yang omp akörö ngarangk elmëepna pö.”

18

Papilon ka kësang pö utpet ëa

¹ Omën pöt pet irën ne kaalak itaangkën ensel munt namp kutömweriaan yangerkël yeiraan itenaut. Pöp Anutuuk weëre kosang kësang mangkën pim ëwaöök yangerk ëwa ë pet yair.

² Pël ëën pi ngön ë olëak epël ya.
“Papilon yok utpet yaë.

Papilon ka kësangö utpet ëak kö yes.

Pël ëën peene urmer ke nampre nampre int utpetarö pitëmënt pëen wë.

³ Ka kësang pö utpet yes pöta songönte epël.

Öng pöpök omën nampë muntap wain iit mangkën nak kön irikor yaë pöta ök

omp nga ěere utpetat kēsang ě pěl yaaō pōt pet
elměen yang oměn pourō tapěl ěeim wěaurō.

Pěl ěak yang omp akōrō pit ōng pōpring utpetat
ěeimaurō.

Pěl yaěěn ōng pōpě oměn nant kēsang ōpnaataan
kentre kaur yaaō pōtaan

yangerakě oměn monere urōmatěěn ya
yaměngkaurōak omnant menak pim naěaan
sum kēsang weima.

Pōtaanōk kō yes.”

⁴ Pěl yaan ne kat wiaan ngōn munt nent
kutōmweriaan epěl ya.

“Nem omnarō, ar ōng utpet pipop sěp wesak kas
seě,

ōng pipopring wě saun koirak pōtě kangut
ōnganěěn.

⁵ Ōng pōpě utpet yaaō pōt kēsang paně sěěn
Anutu kutōmweri wě pōp itenak utpet kangut
mampěněak kōn wieim wě

⁶ Ar oměn utpet kangut pi mampuně pōrō pim
kělangōn oměn muntarō yemengka pōtōn
kōn wiak kangut mampun.

Ar pěl ěěněak pōt pi omnarō utpet mena ěěn pōt
kangiir il wesak mampun.

Oměn nampě muntap i ngaat mangkěn nak ut-
pet yes pōl ōng pōpōk omnarō utpet wesak
kělangōn kat mowieima.

Pōtaanōk i nga kosang paněět yemangk pōl il we-
sak kělangōn kēsang kat mowiin.

⁷ Pi pimtěn wak isak yeem pim utpet yaautěěn
ěrěpsawi eima pōta ōk

arōk kangiir kělangōn kat mowiin ing ap.

Pim lupmeri kōn korar epěl wieěaup.

‘Ne öng ak kësangëp yak omp ak urtak wel aisëë
omnarö ngarangk yaalmëaup.

Ne öng kapidöa ök omnantëën il ngentingenti
naënëp.

Könöm nant nem naë oröön ingre ya ilak
naënganëëp.’

⁸ Pimtok kön korar pöt wieëa pötaanök kët kopët
nentak utpet epot pim naë orööpnaat.

Anutuuk maan yaumanre ngöntök yaaöre ën ingre
ya ilak yaaö pöt orööpnaat.

Aköp Anutu utpet kangut yemengka pöp weëre
kosang kësang yaaup yak

puuk maan es kotöpnaat.”

Pël yaan kat wiaut.

⁹ Yangerakë omp ak piiring ya utpet yamëngkem
pötëën ërëpsawi eimaurö öng pöp, ka kaö pö, es
yokotön koulöpö ngaarëk yawisën itenak pimëën
ingre ya ilak apnaarö.

¹⁰ Pit Papiilon ka kaö pöökë omnaröa këlangön
kat yawia pöten itenak pitta tapël ëëpanëak kas ëën
om kamaarek taueë epël apnaat.

“O yakom, ka kaöaöön yaköm pan.

Papiilon ka kaöaö, 1 aöa akun kot pita öngpök
nim saunatë kangiir utpet yaën.”

Pël yaan kat wiaut.

¹¹ Ën yangerakë omën monere urömatëën ya
yamëngkauröeta omnaröak pitëm naëaan urömat
kaalak sum naëpan pël wesak pimëën ingre ya ilak
apnaarö.

¹² Pitëm uröm pöt epot. Koolre siluwa, kël
ompyaut, polere kal, songre sar, poë koröp ke
naöre naö ompyaö retëngretëng äaut, këra köp nga
kamp ke nampre namp yaautre omën nant këra

sum kësangötök ket äaut, aini parasre yaap, kël retëngretëng äautök ket äaut,

¹³ omën kamp ompyaö këra koröp neweriaan yewaut yapinte sinamon pël yema pötre ëwamöt, këra ëpre kömau nga kamp ompyaut, wainre i kolap kaömp ar ëëpnaat, korupaë lölöpöt, pol purmakaöre sëpsëpörö, pol osöröere ën kaar pitëm wii ngan ëak wak weruak yaautre, ën omën inëen yaauröere, pitëm sum yaaö pöt pipot.

¹⁴ Omën monere urömatëen ya yamëngkauröak öng pöpön epël ya.

“Omën nant nim ömëak kent kön yawian pöt sasa won yes.

Monere këere kaömpre omën ompyaö ë rangi pötta won yes.

Pötaan omën pipot pout kaalak naöngan, won pan.”

¹⁵ Pël ëak omën monere urömatëen ya yamëngka pörö omën ke pilöt pim naë sum yeëa pörö Papilon ka kaö pöökë omnaröa këlangön kat yawia pöten itenak pitta tapël ëëpanëak kas ëen om kamaarek taueë ingre ya ilak ëak epël apnaat.

¹⁶ “O yaköm, ka kësangöön yaköm pan.

Ka kësang epö öng nampë ök.

Pi ulpëen ompyaö retëngretëng köp nentepar möa namp mëak

pim koröpöök koolre songre sar ë rangiak wëaup.

¹⁷ Akun kot 1 aöa pöta öngpök pim monere uröm pout kö yes.”

Ën i kaö wangatë ngarangk pöröere omën narö wangat wak ka muntatë yes piporö, wangatë inëen yaauröere omën i kaö pöök mon ya yamëngka pörö pourö pit Papilon kak pëlëer wiaan kamaarek taueë

18 itaangkën ka pö es yokotem koulöpöt oröak yesën itenak ngön ëak epël yema. “Elei, ka kësang epöökë ök naö e nerek wi naön, won pan.”

19 Pit pël mëak kaplak ilaimeë ingre ya ilak ëak epël aim wë.

“Ö yaköm, ka kësang epöön yaköm pan.

Wangatë ngarangk yaaurö tiar ka kësang epöökë urömat wak yesem monere uröm kësang weimaurö.

Akun kot 1 aöa pöta öngpök ka epö kö yes.

20 Kutömweri ngëëngköröere Anutuu ngön yaaöre tektek ngön yaaö omënere pim omën muntarö ar ka pö won yes pötaan ërëpërëp ëën.

Ka pöök utpet elnieima pötaan Anutuuk kangut yamangk.”

Pël yaan kat wiaut.

21 Ën ne kaalak itenaan ensel weëre kosangring nampök kël kësang panë naö wak wal ëak i kaöök yoolëem epël ya.

“Nem këlö i kaöök yoolak epël

Anutuuk ka kësang Pabilon pö utpet wasën sasa kö sëen kaalak itnaangkan.

22 Pël ëën intöere iraö ngön aöre pëëp mëmpö, polere kuup ngön aö pöt ka pöökaan kaalak yaan kat nawiingan.

Ën omnarökta ka pöök ya ke nentere nent yamëngkën itnaangkan.

Korupaëta kas yamöem yaan kat nawiingan.

23 Ka pöökaan es rampe newes kaalak ëwa naën ëëpnaat.

Öngre omp yaëën ipre kër yemangka pötenta itnaangkan.

Ngaantak ka pöökĕ omĕn monere urömatĕĕn
ya yamĕngkaurö yangerakĕ kaö sak
wakaimaurö.

Ĕn ka pöökaan naröak kempre tĕptĕp wak yeem
omĕn muntaröen morök elmĕeimaurö.

²⁴ Papilon ka kĕsang pöökĕ omnaröak Anutuu tek-
tek ngön yaaö omĕnere pim omĕn muntarö
mĕneima.

Ĕn yang omĕn naröeta kööre toköröak mĕneima
pĕl ĕautĕ saunat Papilon ka kĕsang tapöök
wieĕa.

Pötaanök Anutuuk kangut yaalmĕ.”

19

Omnarö Papilon kaö utpet yesĕn ĕrĕpĕrĕp ĕa

¹ Ne omĕn pötön itenak kat wiaan kutömwĕriaan
omĕn kĕsang pan ngön ĕ olĕak epĕl ya.

“Tiar Anutuun yaya mĕpa.

Tiarim Anutu tapöpök tiar utpetetakaan kama
nuwa.

Ĕ rangiere weĕre kosang pipot pim naĕ wia.

² Pi tapöpök pim ngön yaatak omnaröa wĕwĕat
wotpil wesak wĕl yaaup.

Öng omp nga yaaö pöpĕ utpet pömpelök yangerakĕ
omnarö utpet moweseima.

Pĕl ĕĕn Anutuuk pi utpet kangut mena.

Öng pöpök Anutuu inĕĕn ru narö mĕneimaup.
Pötaanök kangiir elmĕa.”

³ Pĕl ĕak pit kaalak ngön ĕ olĕak epĕl ya.

“Anutuun yaya mĕpa.

Ka kĕsang pö es yokotem koulöpö kĕt ĕl epotĕ aprö
seim wĕ.”

⁴ Pĕl yaan ngarangk 24 pöröere kutöm omĕn mor kong nent wĕwĕetaring pörö pit rar rĕ mowesirak tok oriak Anutu pim omp ak urtak wel aisĕĕĕa pöpön yaya mĕak epĕl ya.

“Yaap, Anutuun yaya mĕpa.”

⁵ Pĕl yaan kat wiaan Anutuu omp ak urta naĕaan ngön ĕak epĕl yeem ya.

“Anutuu inĕĕn ruurö, ar pourö tiarim Anutuun yaya maĕ.

Piin kasinkasin yaaö kotre kaö pourö pĕl ĕĕĕ.”

Sĕpsĕp Ruup öng koirĕn pim ipre kĕr mampna akun kĕsangĕt oröa

⁶ Ngön pöt ĕ pet yairĕn ne kaalak kat wiaan ngön munt nempelök omĕn kĕsang pan rongan ĕak wĕ ngön kaĕp aöre i kĕsang nant nga yaurem kuk aö, tangre kaö kĕsang yeraan nga ngön aö pĕl yaĕ pöl ngön ĕ olĕak epĕl yeem ya.

“Anutu tiarim Aköp weĕre kosang pout wieĕaupök peene kĕsang panĕ sak wĕ omnant pout ngarangk yaalni.

Pötaanök piin yaya mĕpa.

⁷ Sĕpsĕp Ruupĕ öng koirĕpna akunet yok jaaröön öngöp piin korkor yaĕ.

Pötaanök tiar kön ompyaö wieĕ ĕrĕpĕrĕp kĕsang panĕ yeem,

pim yapin pingetakĕĕr wak isak aim öpa.

⁸ Anutuuk öng pöp ulpĕĕn ompyaö ĕwaĕwa yaaö kewil won panĕ namp mĕĕpĕnĕak mena.”

Ulpĕĕn ompyaö pöp Anutuu omnaröa wĕwĕ ompyaö wotpilten ya.

⁹ Enselöpök neen epĕl ök yenĕa. “Ni ngön epĕl retĕng ĕ. Omĕn Anutuuk Sĕpsĕp Ruupĕ öng

koirëpna akunetak kaömp ngawi nëmpënëak yas mēeaö pörö erëpërëp ëëpnaarö.” Pël neak kaalak epël yenëa. “Ngön epët Anutuu ngön kë panëët,” pël neeaut.

¹⁰ Pël neaan ne piin yaya mamëak pim ingesiarë ikanöök rar rë mowesirak tok yariin epël yenëa. “Neen pil elnëengan. Anutu pimtënökëer yaya mam. Niire nim kar Yesuu ngönte ök yak pörö tiar ya kopët nent ngawi yamëngkaurö.” Yesuu ngönte ten kaamök elmëen tektek ngöntak aöre songönte tekeri wesak aö pël yeë pöt Pulöökë yaat.

Omën pol os kölamöpë rangk wel aisëëa pöpë ngönte

¹¹ Ngön pöt ök neë pet irën ne itenaan kutömwer kan tēen pol os kölam namp wēen itenaut. Omën namp pöpë rangk wel aisëëa pöpë yapintepar nent, “Yaap wotpil yamëngkaup,” ën nent “Ngön yaap yaaup,” pël ya. Omën pöp pi omnarö ngön yaatak ulmëak kangut mampööre nga elö pël yeem wotpil yaaup.

¹² Pöpë itöörar pöt, es wëlëngöökë ököörar. Ën kepönöök pöt, omp ak ul nant selap waëëa. Pim koröpöök pimtë yapinte wieëa. Pöt pimtökëer ëwat, omën muntarö köpël wë.

¹³ Pim ulpëenëpök omën iitök petak urak wëa. Ën pim yapinte pöt, omnaröak piin, “Anutuu ngönte,” pël yamëëaup.

¹⁴ Pël ëen kutömweri nga omnarö ulpëen ompyaö kölam panë kewil won narö mëak pol os kölam naröa rangk wel aisëak omën pöpë ënëm yes.

¹⁵ Omën pöpë këmtakaan öp nga panë newer oröak irëëa. Öp pöwerring yang omën pim

kööre tokörö mënak weëre kosangring ngarangk elmëepnaap. Puuk wii wain ulöpörö kël kap kësang nentakaan ing mësaan iit yaarö pöl omnaröen Anutuuk ya sangën elmëak mëngkën pitëm iit orööpnaat.

16 Pöpë ulpëenëpökre kopirak pim yapinte epël retëng ëëëa. “Omën omp aköröa Omp Aköp, isauröa Kaöap.”

17 Ne kaalak itaangkën ensel namp këtëpök taueëa. Pël ëëë ngön ë olëak int ngaarëk wal ëak yaauröen epël yema. “Ar pourö Anutuu këere imën nënëën wais rongan ëëë.

18 Ar omën omp aköröere nga omnaröere pitëm wotöököröere pol osöröere pitëm rangk wel aisëak wë pörö pourö, inëën yaauröere yaap wëaurö, kotre kaö, pit pouröa mësepöt nënëën wais rongan ëëë.”

19 Pël yemaan ne itaangkën animaö nga pöpre ën yangerakë omp aköröere pitëm nga omnarö pit Yesu pol osöpë rangk wel aisëëëaupre pim nga omnaröaring nga elëpënëak rongan ëak wëa.

20 Pël ëën puuk animaö pöpre ën tektek ngön yaaö kaar omën pöp wali yeö. Tektek ngön yaaö omën pöp pi wet rëak ya it ngolöpöt animaö pöpë ëöetak mëneimautak omën animaö pöpë yapinte pitëk mowiak animaö kön pimtë ket ëa pöpönta yaya maima pörö morök elmëeima. Pël ëën omën utpet pöaar wak öngöp kësang i kaöökë ököök kël kop retëng ka urauuk es yokota pöwesi yemoola.

21 Pël ëak omën pol osöpë rangk wel aisëëëa pöpök nga omën utpet pöaarë naë wëaö pörö pim öp nga panë këmtakaan oröëëa pöwerring mën wel

yemowi. Pël ëen intöröak wais omën mëna pöröa mësöpöt wa neim olëak kep panë yaë.

20

Seten pi wii kaatak moulmëëpnaap

¹ Ne kaalak itaangkën ensel namp yang ongöp waliöökë kietaring wii seen naö wali wak kutömweriaan yeirëa.

² Pël ëak ensel pöpök kamal kësang ngaan panëer wë Anutuu ëöetak omnaröaan utpet wesak aim wëaup, Seten, pöp enselëpök wak krismaki 1000 pötë öngpök öpënëak wii seen pööring të yemowi.

³ Pël ëak enselëpök wa yang öngöp wali pöökë öngpök moolëak kaalak kan wariak taë panë wes yemoulmë. Krismaki 1000 pöt won nasën wiaan yang omnarö kaalak morök elmëëpanëak pël yaalmë. Ënëmak krismaki 1000 pël won sëënak orö moulmëen akun kot panë nent öpnaap.

⁴ Ne kaalak itaangkën omp ak ur nant wiaan pötë omën narö wel aisëëëa. Anutuuk pit omën muntarö ngön yaatak moulmëak kangut mampna ya pöt mangkën wak wëa. Pël ëen ne itaangkën omën naröa könörö Yesuun kön wi kosang wesak pim yapinte tekeri wes ök aö yeem Anutuu ngönte kosang wes morök wëa. Pitëm pël yaaö pötaan kööre toköröak ngernger il moolaan wel wia. Omën pörö animaö nga pöpre pim kön ket ëa pöpëen yaya maöre pim yapinte pitëm ë kosatëere morötë mowi pël naën ëa. Pitökëër Anutuuk weletakaan wal ë moulmëen wë Kristooring omp ak sak ngarangk wakaimëë së krismaki 1000 ke pipël won yes.

⁵ Pitëm weletakaan wal ë moulmëa pöt wet rëaut. Ën omën munt wel wia pörö wal naën wia. Pit krismaki 1000 pöt won sëënak wal ëëpënëak kor wë.

⁶ Omën Anutuuk wet rëak weletakaan wal ë moulmëa pörö ngëëngk mowasën ërëpërëp eim öpnaarö. Omën pörö kaalak wel wiak es parëaöök nasën ëëpnaarö. Pit kiri ar yauröa ök sak Anuture Kristoon yaya yamëem Kristooring omp ak sak ngarangk yaat mëneim wëën krismaki 1000 ke pël won sëpnaat.

Seten pim këlangön kaö panë kat wiipnaata ngönte

⁷ Krismaki 1000 pöt won sëënak Seten wii kaataakaan kan të mowiin orööpnaap.

⁸ Pël ëak yang kaö nantëaan nantë wëa pörö pouröa naë së morök elmëën rongan nentepar ëën Kokre Mekok pël sëën nga wa top ëëpnaat. Pël ëëpna pörö pangk sangk nekelngan, i pisötë ök kësang panë ëëpnaat.

⁹ Omën pörö yang kaö poutëaan wais Anutuu omnaröere Yerusalem ka kësang pim kent kön wia pö wa taap ëak mëmpënëak yaëën Anutuuk es newes kutömweriaan wes mëën irë omën pörö es kot won wasëpnaat.

¹⁰ Pël ëën Seten pit morök elmëa pöp puuk wak öngöp kësang i kaöökë ököök kël kop retëng ka urauuk es yokota pörek animaö ngaapre tektek ngön yaaö kaar omnamp wet rëak wa moolaan wëa pöwesi moolapnaat. Pël ëën pit omën naar namp pörö rökre kët poutë es yokotön këlangön kësang kat wieim öpnaarö.

Ngōn ya kēsang mēmpnaata ngōnte

11 Ne kaalak itaangkēn omp ak ur kōlam kēsangētere pōtak wel aisēēēa pōpōn itenaut. Pēl ēēn kutōmre yangēr pim naē mop wiak won yes.

12 Pēl yaēēn itaangkēn omēn wel wiaurō kotre kaō omp ak urtak wel aisēēēa pōpē ēōetak taueēa. Pēl ēēn pep nant yawil. Pēl ēak newer yawil. Pōwer wēwē kosangta pepewer. Pēl ēak puuk omēn wel wiaurō pitēm wēwēatē songōnōt pep pōtē iteneē wēl yaalmē.

13 Pēl ēēpēnēak omēn i kaōōk wel wiaurō i kaōōkaan wal yaē. Yaap, omēn wel wia pourō weletekaan wal ēēn neenem wēwēatē kangut yemangk.

14 Pēl ēak welere wel kaō wak ōngōp kēsang i kaōōkē ōkōōk es yokota pōwesi moolaan kō yes. Omēn pōrek sēpna pōrō wel 2 kosang pōt wiak sasa kō sēpnaarō.

15 Anutuuk itaangkēn omēn namp pim yapinte wēwē kosangta pepeweri won ēēn pōt wak ōngōp kēsang i kaōōkē ōkōōk es yokota pōwesi yemoola.

21*Kutōmre yang ngolōpōt yaarō*

1 Ne omēn pōtōn itenak kaalak kutōm ngolōpwerre yang ngolōpren itenaut. Kutōmre yang wet rēak orōak wiakaima pōt kō sak sēēn i kaōōta won wieēa.

2 Pēl ēēn ka kēsang ngēēngk Yerusalem ngolōpōōn itenaut. Ka ngolōp pō Anutuu naē kutōmweriaan yeiraan itenaut. Pō ē rangi ompyaō panē nant ēak wēa. Pōt ōng namp pim omp yaō ēak wēaup ōpēnēak ē rangiak wē pōl ēak yeira.

³ Pël ëen ne kat wiaan omp ak urta naëaan ngön äak epël ya. “Kat wieë. Anutu pi pim omnaröa tekarak wë. Pi pitring wëen pit pim omën sak öpnaarö. Ën Anutu pimtök pitëm naë wë pitëm Aköp pël sak wakaim öpnaat.

⁴ Pël äak puuk pitëm ing telapöt tum mokorön ërëpërëp ëëpnaat. Pöt pit kaalak wel wiire ën kön utpetaring wë, ingre ya ilak aöre këlangön kat wi pël naën ëëpnaat. Omnant ngaan wiakaima pöt pout won sa pötaanök.”

⁵ Pël yaan omën omp ak urtak wel aisëëäa pöpök epël ya. “Kat wieë. Ne peene omnant pout ngolöp wesak orö yaulmë.” Pël ök äak neen epël yenëa. “Ngön epot yaap panëet, omnaröa kön wi kosang wasëpnaat. Pötaanök retëng ë.”

⁶ Pël neak kaalak epël ök yenëa. “Omën epot pout yok oröak wë. Ne tapöp wot rëaupök kaalak ënëm remaap. Omnant ngës rë ulmëaupök kaalak pet irumaap. Omën namp iiten yaëen pöt nook i omnaröa kol mangkën nak wëwë kosangta yaö sëpnaat sum won mangkën nëmpnaap.

⁷ Omën namp pim wëwë ompyautak utpetat il wasëpna pöp omnant ompyaö epot poutë pep sëpnaap. Pël ëen ne pim Anutu pël sak wëen pi kangiir nem ruup pël sak öpnaap.

⁸ Pël ëëpnaatak omën toköröen kas äak neen kasëng nampööre kön wi kosang nengewasën ë, ya utpet ke nentere nent mëmpööre omën muntarö mën wel wi, öngre omp nga ëëre kipre këar nga ë, Anutuu urtak omp ak kaaröröere kön ket ëauröaan ngëëngk wesak yaya aöre ngön kaar aö, omën ke pil yaaö piporö pourö öngöp kësang i kaöökë ököök kël

kop retëng ka urauuk es yokota pöwesi së es koteim öpnaarö. Pël yeem wel akun 2 kosang pöt wiak sasa kö sëpnaarö.”

Yerusalem ka ngolöpö

⁹ Pël neaan ensel 7 pöröakaan namp nem ngësë waisa. Ensel 7 pörö pit söwar 7 äak omën utpetatta 7 tapël äak wiak wak wëa. Pöt ënëmak akun pet irëpënëak yaëën omnarö utpet mowasëpnaat. Pöröakaan namp nem naë wais epël yenëa. “Ni wais. Pël ëën Sëpsëp Ruupë öng koirëpnaapön pet elniimaan,” pël yenëa.

¹⁰ Pël neaan Pulöökë weëre kosangö nem naë oröön ensel pöpök ne wa newak së tomön wali panë naöök neulëak Yerusalem ka ngëengkö Anutuu naë kutömweriaan yeiraan pet elnëën itenaut.

¹¹ Ka kësang pöök Anutuu ëwaö elën ëwa ke maim nal panë tëak wieëa. Pöt yaap kël ompyaö saspaare ën könitweri yaë pöl pan ëwaëwa yeem wëa.

¹² Yerusalem ka pöök ëm kësang wali panë naö ök rëëëa. Ëm pöök kan 12 äak rë wieëa. Pël ëën ensel narö 12 tapël äak kan ëëtë ngarangk taueëa. Kan pötë Israel omën kur 12 piporöa yapinöt retëng ëëëa.

¹³ Ëm këtëpë yengampiaul pöök kan neraar ner äak rë wieëa. Këtëpë yeilëaul we pöökël kan neraar ner tapël äak rë wieëa. Ën we naöökaan naöökta om tapël ëëëa.

¹⁴ Ëm pöökë ingöök kël 12 äak kosang wesak wieëa. Kël pötë Sëpsëp Ruupë ngön yaaö omën 12 pöröa yapinöt retëng ëëëa.

15 Ensel neen ngönaak neea pöp pi këkalëp ök yawia koolötök ket ëa naö wali wak wëa. Pö ka kësang pööre ëmööre ëm kanöt ök wiipnaö.

16 Ka pöökë ë mor kong nent pötë waliit ke kopëtal pan. Ën ensel pöpök ka pö pim këkalëpööring ök wiin waliire mëntere tingk pöt ke kopëtal yaë. 2400 kilomita pël yaë.

17 Pël ëen enselëpök ökööring ëmööké tingkët ök wiin 70 mita pël yaë.

18 Ka kësang pöökë ëm pö, kël ompyaö saspa pööring ök rëeëa. Ën ka pö kool pëenëetök ök raan könitweri ök pengpeng yeëa.

19 Ën ëm pöökë ingöök kël sum kësang yaaö ke naöre naöring ë rangi ulmëeëa. Kël ompyaö wet kaal panë rëak wia 1 pöökë yapinte saspa, ën munt kunöm ka ura 2 pöökë yapinte sapaia, ën munt kölam 3 pöökë yapinte aket, ën munt këra ëp koröp oröa 4 pöökë yapinte emeral,

20 ën munt köp möaare kölam koröp oröa 5 pöökë yapinte satonikis, ën munt köp möaö 6 pöökë yapinte konilian, ën munt kop retëng ka ura 7 pöökë yapinte krisolait, ën munt këra ëp koröp oröömaap kangk ëa 8 pöökë yapinte peril, ën munt kop retëng ka urömaap kangk ëa 9 pöökë yapinte topas, ën munt kop retëngre këra ëp koröp ka urömaap kangk ëa 10 pöökë yapinte krisopres, ën munt kunöm ka urömaap kangk ëa 11 pöökë yapinte aiasin, ën munt köp karkar möa panë 12 pöökë yapinte ametis. Kël ompyaö 12 epotring ëm ingöök wiak ë rangi ulmëeëa.

21 Ën ka kan 12 pöt kal kölam sum kësangring nant 12 pöttring ket ëeëa. Kal naöök kan newer

naöök newer pël ëëëa. Ka kësangöökë kamënt pötta koolötök lë mëën könitweri ök pengpeng yeëa.

²² Ne ka kësang pöök ngëëngk tup nent ök rëan itnaangkën, won. Aköp Anutu weëre kosang pout wieëaupre Sëpsëp Ruup piarpimtok ngëëngk tup ket ëak wëa.

²³ Ka pöök këtren ngoon ëwa naö naëpan, won. Anutuu ëwaöök së elën Sëpsëp Ruup es rampewesi ök ket ëak ëwa ëën ka pöök ëwa tëak wia.

²⁴ Yangerakë omën pourö ka pöökë ëwaöök kan ing yaaurö. Ën yangerakë omp akörö pitëm ë rangiat ka pöökë wak sëpnaarö.

²⁵ Ka pöök koö noolapan. Pötaanök kët poutë ka pöökë ëm kanöt të wiakaim öpnaat.

²⁶ Pël ëën omën pourö pitëm monere urömere ë rangiat pout ka pöökël wak sëpnaat.

²⁷ Pël ëëpnaatak omën wëwë utpet ke nentere nent yaautre kömkëënringöt yaautre kaar yaaut pangk wak ka pöökë öngpök nasëpan, won. Om Sëpsëp Ruupë yapinöt wëwë kosangta pepeweri retëng ëa pöröakëër ka kësang pöökë öngpök sëpnaarö.

22

Wëwë kosangta iitere këraament

¹ Ensel pöpök kaalak ka pöök i omnaröa kol mangkën nak wëwë kosangta yaö yesa pömerën pet elnëën itenaut. I pömer könit ket ëak ëwaëwa yaaumer Anuture Sëpsëp Ruupë omp ak urtakaan oröak yesaumer.

² I pömer ka pöökë kamtaöökë luptak yesaumer. Ën i pömeri poö naöökaan naöök këra nant wëwë

kosangēt yemengka pōt tau seēa. Pōt krismaki kopēt nenta ōngpōk akun 12 ēak ulōpōrō ngoon nampnampē ōngpōk utō aprō yesa. Kēra pōtē ēpōtōk omnarōa kēlangōnre yaumanōt ompyaō yemowesa.

³ Omnant pout Anutuuk won wiaapēnēak kōn wiaut ka pōōk wi naōpan. Om Anuture Sēpsēp Ruupē omp ak urōt ka kēsang pōōk wiaan Anutuu inēen ruurō piin yaya maim ōpnaat.

⁴ Omēn pōrō pim kēēre wot kanten itaampnaat. Pēl yaēen pim yapinte pitēm ē kosatē wiaapnaat.

⁵ Ka pōōk koō olaan es rampeere kētēpōk ēwa naēpan, won. Akōp Anutu pimtē ēwa kēsang pōmpelōk ēwa elmēaan pit omp ak sak akun ēlōtē om omnant poutē ngarangk wakaim ōpnaarō.

Yesu pi teēt kaalak waisēpnaap

⁶ Ne pōtōn itenaan enselēpōk epēl ōk yenēa. “Ngōn epot pout yaap panēēt, omnarōa pangk kōn wi kosang wasēpnaat. Akōp Anutu pim Pulō tektek ngōn yaaō omnarō kaamōk yaalmē pōpōk pim inēen ruurō omēn peene orōōpnaatōn ēwat sēpēnēak pim ensel namp pitēm naē wes mēa.”

⁷ Pēl yenēaan Yesuuk epēl ōk ya. “Kat wieē. Ne teēntom waisumaap. Omēn namp nem tektek ngōn pep epweri wia epot ngaarēk weim ōpna pōp pi ērēpērēp ēēpnaap.”

⁸ Ne Sonok ngōn epot kat wiak omēn epotōn itenaut. Ne epotōn kat wiire itaampō pēl ēak ensel ōk neeaōre pet elnē pēl ēaō pōpē ingesiare ikanōōk rar rē mowesirak tok oriak piin yaya mamēak yaēen

9 epël yenëa. “Ni neen pil elnëengan. Anutu pimëntenökëer yaya mam. Niire nim kar tektek ngön yaaöre omën pourö ngön pep epweri wia pöt ngaarëk yeö pörö tiar ya kopët nent ngawi yamëngkaurö pötaanök.”

10 Pël neak pi kaalak epël ök yenëa. “Anutuu ngön pep epweri wia epot ngep ëak önganok. Ngön pötë këët orööpna akunet temanöm yes.

11 Omën wëwë utpet wëa pöp piita om yal menak pël ë seim öp. Kewilring wëa pöp piita om yal menak pël ë seim öp. Wotpil wëa pöp piita om yal menak pël ë seim öp. Ēn lup kölam wëa pöp piita om yal menak pël ë seim öp.”

12 Pël yenëaan Yesuuk kaalak epël ök ya. “Kat wi. Ne teëntom pan waisumaap. Ne omën pouröa sumat wak wais pitëm omnant yaautë kangut neenemot mempaap.

13 Ne tapöp wot räaupök kaalak ënëm remaap. Ne omnant ngës rë ulmëaupök kaalak pet irumaap.

14 “Omën pitëm ulpëënöt iirak lup kölam wë pörö pit ërëpërëp ëëpnaarö. Pël ëak këra wëwë kosangët yemengka pömentëkaan yok pangk ulöp tö nak ka kësangöökë ëm kanöt tē wiaan öngpök ilapnaarö.

15 Pël ëëpnaatak omën ke epëlörö ka pöökë öngpök neilapan, om ka tomök öpnaarö. Kentre pol ket ëak wëwë kewilring wëere kipre këar nga ë, öngre omp nga ëëre mën wel wi, Anutuu urtak omp ak kaaröröere kön ket ëauröaan ngëëngk wesak yaya maö, ngön kaar aöre pötë ënëm ë, omën ke pil yaaö pörö ka tomök öpnaarö.

16 “Ne Yesu nook nem ensel namp wes mëen wais ar ingre mor sauröen ngön ök niia. Ne Tewit

pim kurmentëkaan oröaup. Ne tapöpök tangewesi ök ëwaaringëp.”

17 Pulööre Sëpsëp Ruupë öng yaup piaripök, “Ni wais,” pël ya. Pël ëën omën namp ngön pipët kat wiak pöt puukta, “Ni wais,” pël ap. Yaap omën namp iiten yaëën pöt waisëp. Pi i omnarö kol mangkën nak wëwë kosangta yaö yesa pöt nëmpënëak kent yaëën pöt nëmp. I pöt sum won, yaap nëmpnaat.

18 Ar Anutuu tektek ngön pep epweri wia epot sangk kelak kat wiinëeröaan pepanöm ngön epët ök yeniak. Omën namp Anutuu ngönte wak pim könöökään ngön munt nantring yal menak irikor ëëpna pöp Anutuuk maan omën utpet nant omnarö utpet mowasëpna pep epweri retëng ëa pöt pim naë orööpnaat.

19 Ën omën nampök pep epweriaan Anutuu ngön nent kërë olëak irikor ëëpna pöp Anutuuk kangiiir piin epël mapnaap. “Këra wëwë kosangët yemengka pömentëkaan ulöp tö nëëre ka kësang ngëëngk epöök wë nem omnaröa ëëpënëak pep epweri ngön ëa pöl naëngan.”

20 Ngön epot tekeri wesa pöpök epël ya. “Yaap, ne teënt waisumaap.” Yaap. Aköp Yesu, ni wais.

21 Aköp Yesu pim komre kolap pöt Anutuu omnarö arim naë wiaap. Yaap.

NGÖNËN PEPEWER
The New Testament in the Weri Language of Papua
New Guinea
Nupela Testamen long tokples Weri long Niugini

copyright © 1984 Wycliffe Bible Translators, Inc.

Language: Weri

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 1 Oct 2024 from source files dated 31 Aug 2023

ec1ac06d-1c8c-5be3-8326-dcf0ceacd4c2